

Pɔl saba cir kaplāŋ Korntifa ye

Syaha fla

¹ Ndoɔ Pɔl kē ma suhu wo Yesu kāndeyārwe Sohotān ne, too saba nwo yrūhū nɔ wāã. Ndoɔ Pɔl kē, le tǎy Yāhā ye ke n ta yee, n ba nii Yesu Crise tēnlɛɛ. ² Wo u saba yrūhū nɔ wāã Yesu kāndeyārfa yawāhāfa kē Kornti wo. Yāhā pe yee, ma pe ta ke wām, pe n wāã le Yesu Crise kāmāy na. Wo u yrūhū nɔ wāã mpāy bya kē pe ma teebɛɛ byɛ wo, ma -sē wo Yīŋfua Yesu Crise miingbāŋ gbobo. Woo kē pe Yīŋfua tesē wo byɛ Yīŋfua.

³ Wo Tuhufua Yāhā ma suhu wo Yīŋfua Yesu Crise ne, ke ke laantār wīl pye ye kē, tesē pe pe yrīŋ wāã ye kē.

Korntifa Yāhā laantār wūhū yāã Yesu Crise kāmāy na

⁴ Yāhā laantār wīl lii pye ye kē Yesu Crise kāmāy na, yalebye n syaha wāã ke kē loo wīl na. ⁵ Ye cā tee wāã le Yesu Crise ne, Yāhā ta ye n kayūhū yāã ye kānkai- byɛ wo. Koo kayūhū kē ye le Yāhā kapāyīl cā, ye le war. ⁶ U Yāhā Yīndefua Crise kapāyīl nnen gbāã ye laam wo, ⁷ ye n sya ke Yāhā kayūhū yāã. Koo ke ye ta ye n waha wo Yīŋfua Yesu Crise wādurbaŋ sēŋ. ⁸ Woo kē u ga ye ta ye n yii plāhā yaha, u ma ba dur ba, waa

ma n ba yãã ye plaha laa ne ye. ⁹ Yãhã ma yẽ ter lii ne, ke le pye, koo gii ke ye yee, ye seefar le ke Dya Yesu Crise ne, woo wii u ma wo Yĩnfua.

Pe Yesu kãndeyãrfa tee ma creŋcreŋ Kornti wo

¹⁰ Wo nna, n ga le nar waha ye ye wo Yĩnfua Yesu Crise myaha ne: -Ye wãã le, ye ma syi ye nii creŋcreŋ ye! -Ye nii yĩmbui nen na, -tee nii laantee nen ne! ¹¹ Wo nna, ye sã yãã, cɔɔ nwo pe n yee Klowee, u kahafa mpãy ra yar ma yee, wãhã ma ye nsoho wo. ¹² Lii le ma le na, ye kaplãŋ ma ke ya wuhu na: Nwo ga yee woo ma Pɔl kur ye, waa ter ga yee woo ma Apolosu kur ye, waa ga yee woo ma Pyar kur ye, waa ga yee woo ma u Yãhã Yĩndefua Crise kur ye. ¹³ Tee le cã laha ma yee, u Crise sã la cer fle fle ye, ye tee nii creŋcreŋ. -Ye yãŋ, ndoo Pɔl sã kã tã ku trã na ye wĩ na ye. Ye sã maha tãã yi loho wo ndoo myaha na ye. ¹⁴ N syaha wãã Yãhã kã tã sã ye tãã yi loho wo ye, ma yi kãã Kirpusu na, Kayusu ne. ¹⁵ Loo na, waa saha yee ndoo kã n ye tãã yi loho wo ta myaha na ye. ¹⁶ Cĩĩnde, n maha Tefanase kahafa tãã yi loho wo. N sã -sã le sya n maha waa tãã yi yãã loho wo nantãŋ ye. ¹⁷ U Crise sã ra lehe wãã nawee- wãtãã myaha na ye. U ra lehe wãã, n ba naa le kapãyĩ wũhũ yar nawee-na. U sã ra lehe wãã, n ba naa le kapãyĩ wũhũ pãã mii pe nawee- kacãn wũhũ pãã mii syi dyaŋ ye. U Crise wãku wĩ trã na, n ma le pãã nawee-kacãn yor ne, le saa pii sa ye.

Yesu Crise ma Yãhã laantor ne, tesẽ ke fãngangbãŋ ne

¹⁸ Ye sē yāā, mpāy pe wīī ga ba klaha-, ma'a Yāhā Yīndefua Crise trā wāku wīī pāā pe ye, pe ga yee, a yīŋ wee le na ye. Ma -sē yee wii poo na too sya yaha u Crise kāmāy na, wo cā Yāhā fāngangbāŋ kē u Crise trā wāku wīī ne. ¹⁹ Loo ne le yrūhū yaha Yāhā sabangbāŋ wo ma yee, Yāhā yee:

«Mpāy pe ma laantorfa,

n ga pe laantor wūhū pye klaha- pe kē.

Mpāy pe ma kaicāfa, n ga pe kacān wūhū sye.»

²⁰ Loo na, ma'a nii laantorfua, laa na kaicāfua, laa na kaplāntāhā pāāfua driyē wīī na, le wāyīī -sē ma na ma ye? Yāhā ge le yar ma yee yīŋ wee driyēfa kacān na ye.

²¹ Ye sē yāā, driyēfa laantor pe ta pe sē waha Yāhā laantor war ye. Loo ne, mpāy pe Yesu ta pe Yater, Yāhā yee ke ga poo sya yaha le Yesu kapāyīī kāmāy na, lii le n pāā driyēfa ye, pe n yee yīŋ wee le na ye. ²² Yiifēe- n ke laanwo wūhū n pye pe n yāā yīnde ne. Jrekefa n ke pe kacān yāā driyē wūhū wīī na. ²³ Wii poo na, wo u Crise trā wāku wīī pāā nawee- ye. Loo nde ncafūhū yigi pe Yiifēe- kē; mpāy pe wee Yiifēe- ye, poo n yee yīŋ wee le na ye. ²⁴ Yesu kāndeyārfa bye, mpāy pe ma Yiifēe-, tesē mpāy ne pe wee Yiifēe- ye, poo ye u Crise ma Yāhā fāngangbāŋ, ma maha ma ke laantor. ²⁵ Yāhā wūhū nkāy nawee- n yee yīŋ wee ke na ye, ke ter gboho nawee- laantor wūhū na. Tesē, Yāhā wūhū nkāy nawee- n yee fānga wee ke na ye, ke ter gboho nawee- fānga na.

²⁶ Wo nna, tee wee ngaa driyēfa yīnde na ye, Yāhā n -sē ye yāŋ yi, -ye loo yāŋ! Ye laam wo,

kaicāfa sē nihi ye, fāngafa sē nihi ye, nangbām sē nihi ye. ²⁷ Mpāy pe wee kaicāfa driyēfa yīnde na ye, Yāhā poo yāŋ yi, ma fyar yaha mpāy na pe ma kaicāfa driyēfa yīnde na. Mpāy pe wee fāngafa driyēfa yīnde na ye, Yāhā poo yāŋ yi, ma fyar yaha mpāy na pe ma fāngafa driyēfa yīnde na. ²⁸ Mpāy pe ma naflam, driyēfa sē pe yāŋ nawee draha wo ye, ma suhu mpāy ne pe wee ngaa driyēfa yīnde na ye, Yāhā poo yāŋ yi, ma -sē pe driyēfa fānga wīi kua, ²⁹ nawee waa ma n waha u ya sey Yāhā yaha ye ye.

³⁰ Yāhā -sē ye ta ye n seefar le Yesu Crise ne, woo kē u laantor le nawee laam wo. Woo kāmāy na wo sron Yāhā yīnde na, wo nii Yāhā wām, wo maha wāsyayaha yāā. ³¹ Loo ne, le yrūhū yaha Yāhā sabangbāŋ wo ma yee:

«Waa sē yai u naa u ya sey ye,
u yai u naa Yīŋfua Yāhā koo sey.»

2

Yesu Crise trā wāku wīi loo le ma yīŋ

¹ Wo nna, tē ba ka ye fla na, maa le Yāhā kapāyīi wīi pāā ye ye, ta yē kaplāŋ pye yaayaa, ta kacāyor sē maha ba ter ye kacān fla yaha ye.

² Ye sē yāā, tē pye ye nsoho wo, n ba yee n saa laa pāā ye ye mii Yesu Crise wīi ya sē ne, tesē u trā wāku wīi ne ye. ³ Tē pye ye fla na, fānga sē pye ra na ye, n naa n fya ma sya naa n sege.

⁴ Kaplāŋ nkāy tē naa n pāā ke pye gbegbe, ke sē pye kacāyor kaplāntāhā ye. Yāhā Yrā Fānga pye ra kaplāŋ na, ma ta nawee- n naa ke kaplāŋ sya.

⁵ Loo na, driyěfa laantor ter sē ne te ye ta ye n Yesu ta ye Yater ye, Yāhā Fānga koo kē.

Yāhā laantor

⁶ Mpāy pe yīntar too Yesu Crise kānde wo, wo laantor raa wīl pāā pe ye. Driyěfa laantor ter sē ne ye, driyě yīnfa laantor ter sē maha ne ye, poo mpāy pe fānga ga ba pye klaha- pe ye. ⁷ Yāhā laantor wīl ne too n pāā, tii driyěfa sē te war ye, te wūhū pe na. Driyě sē bii tāhā wa ye, Yāhā bii too laantor cāā gbihi ta wa wo kē, wo nayōr wāyāā wīl na. ⁸ Too laantor wee driyě yīnfa ye ye. Mii loo sē ne ye, pe saa ne pye pe Yesu Crise kuey mar boo trā na ye, woo wii u ma nayōr ter bye Yīnfua. ⁹ Loo ne le yrūhū yaha Yāhā sabangbān wo ma yee:

«Kai- nkāy nawee waa sē ke yāā yāā yīnde ne ye,
waa sē maha ke luhu yāā ye,
ke sē pye yāā waa laam wo ye,
Yāhā koo cāā gbihi ta
mpāy kē ke ntān dye pe tāy.»

¹⁰ Koo kai- ngīl Yāhā ke yar wo na ke Yrā kāmāy na. Ye sē yāā, Yāhā Yrā Fānga kai- bye cā, Yāhā wūhū nkāy ge ne ke sē n yi gbaa na ye. ¹¹ Ye cā, waa saha nawee laam wīl cā ye. Nawee yrā lii le ma u laam wo, loo ne le u laam wīl cā. Ke syi, waa saha Yāhā laam wīl cā mii Yāhā Yrā sē ne ye.

¹² Wii poo -sē na, driyě nge yrā ter sē ne le ma wo laam wo ye. Yāhā Yrā ter loo ne too yāā; Yāhā le wāā wo kē, ma yee wo waha ke kayūhū cā, kayūhū nkāy Yāhā ke wāā wo kē. ¹³ Wo koo kayūhū ngīl wīl pāā nawee- ye. Wo sē ke

pãã driyẽfa kacãyor kaplãntãhã ne ye; Yãhã Yrã kaplãn nkãy le wo yẽ wo, koo too n pãã. Yãhã Yrã kaplãn kẽ ke ne ke Yãhã Yrã wũhũ pãã.

¹⁴ Nawee wii Yãhã Yrã wee u laam wo ye, u saha Yãhã Yrã wũhũ yãã ye; woo ye, yĩŋ wee ke na ye. U saha ke war ye, ke n war Yãhã Yrã kãmay ya na, koo kẽ. ¹⁵ Nawee wii u Yãhã Yrã yãã, lii le sron lii ne le sã sron ye, u koo war. Woo na, nawee waa ter saha u wũhũ war ye, nawee wii u sã Yãhã Yrã yãã ye. ¹⁶ Loo ne le yrũhũ yaha Yãhã sabangbãŋ wo ma yee:

«Yoo Yãhã laam wũhũ cã,
ma ga waha naa ke klaha kai- ne?»

Wii poo -sẽ na, wo ma Yãhã Yĩndefua Crise laam ter ne.

3

Yãhã tẽntẽ- wĩ

¹ Wo nna, n sã ba naa kai- pãã ye ye, mii mpãy dyaŋ Yãhã Yrã laantor ma pe ye ye. Ye naa ye laam wũhũ ya pye, ye pye mii pẽyãr dyaŋ le Yãhã Yĩndefua Crise kãnde wo. ² Kai- nkãy tẽ naa n pãã ye ye, ke pye mii yĩm dyaŋ tẽ naa n wãã ye kẽ; ke ma ne pye mii wãε digi dyaŋ, ye saa ne waha yia ye. Yagaa gε na, ye saha yia ye, ye tee mii, ye laam wũhũ ya tee n pye nantãŋ. ³ Ye sã yãã, tee laanyar pye yii na, wãhã ke maha ma ye nsoho wo, koo ngĩ le yar ma yee, ye ye laam wũhũ ya pye, ye ma mii driyẽfa dyaŋ. ⁴ Ye laam wo, nwo ga yee woo ma Pɔl kur ye, waa ter ga yee woo ma Apolosu kur ye. Loo nde le yar ma yee ye ma mii driyẽfa dyaŋ.

⁵ Apolosu wĩĩ ma lii ne? Ndoo Pɔl, ta wĩĩ ma lii ne, ye n nii n wãã wo wĩĩ na? Yãhã tẽntẽ- ya me wo ne, ke wo tẽj la wo kẽ. Wo kãmay na ye Yesu ta ye Yater. ⁶ Le ma mii ndoo Pɔl ngaa sĩĩ wãswĩĩ ya, Apolosu n loho ya woo ke na, Yãhã koo n -sẽ ke ta ke n yir. ⁷ -Ye yãŋ, u sũĩfua wee ngaa ye, u lawoofua wee ngaa ye. Yãhã gii ke ke ta ke n yir, koo kẽ ke ma yĩŋ. ⁸ U sũĩfua ma suhu u lawoofua ne, pe ma wãcɛŋ. Pe pe tẽn tẽ mii syi dyaŋ, Yãhã ga ba pe dããn wãã pe kẽ koo syi, pe ya wuhu na.

⁹ Ye sã yãã, ndoo ma suhu Apolosu ne, wo ma mii tawarfa dyaŋ Yãhã ye. Yii -sẽ ma mii tar dyaŋ Yãhã ye. Ye maha ma mii kangbãŋ dyaŋ ke fãã yir Yãhã kẽ. ¹⁰ Yãhã ndoo ta ra n waha yia, ma ke kangbãŋ nakũy kã mii kaha fããfuayõ dyaŋ. Yãhã ke laantãr wĩĩ nde pye ra kẽ. Waa ter n -sẽ ba fãã taha koo kaha nge nakũy na. Mpãy byɛ pe -sẽ ga ba fãã naa n taha ke na, pe pe ya yigi pe wãfãã ter ne. ¹¹ Koo kangbãŋ nakũy lii le ta wa, loo ne Yesu Crise wãtaŋ ne ye Yater. Yĩŋ wee kangbãŋ gaa ter nakũy na Yãhã ye ye. ¹² Nawee-mpãy fãã n taha ke kangbãŋ nakũy na sãn wãn ne; mpãy, wargbɛ wãn ne; mpãy, ntẽmbar raa ter ne kacãn wee te dir na ye. Mpãy ter maha ma, pe fãã n taha katyigi ne; mpãy, nyẽfar ne; mpãy, nyõr ne. ¹³ Yesu Crise kasãhã per maa nɔ, naa ga ba ta le n cã mpãy poo wãn yõ, naa saha te pye klaha- ye, wãn tii pe fãã naa n taha te ne. Mpãy, naa ga waha pe wãn pye klaha-, le bya ga ba cã. ¹⁴ Naa ma yee ke sã wii tẽn klaha-kãã koo kangbãŋ nakũy na ye, ufua ga dããn yãã. ¹⁵ Naa ma -sẽ wii tẽn klaha- kãã, koo kangbãŋ

nge nakũy na, ufua saa dāān yāā ye. U ga nii mii nawee wii dyaŋ, naa u wān bye suhu, woo ya n yi le wo.

¹⁶ Ye sē cā la ma yee ye kadye ma Yāhā niisaha, Yāhā Yrā Fānga ma ye nanem bye laam wo?

¹⁷ Nawee wii ma koo Yāhā niisaha pye klaha-, Yāhā ga woofua bya pye klaha-. Ye sē yāā, Yāhā niisaha ma Yāhā wāŋ. Ye bye -sē ma Yāhā niisaha.

¹⁸ N ga laa pāā ye ye, waa ma syi u u ya kar yaha le ne ye, loo ne nde: Ye laam wo, waa ma yee woo ma driyēfa laantor ter ne, u too miy yaha. -Tuu Yāhā laantor ter gbe, too tii yīŋ wee te na driyēfa ye ye. Loo na, u ga nii cīinde laantorfua Yāhā ye. ¹⁹ Ye sē yāā, yīŋ wee driyēfa laantor ter na Yāhā ye ye. Le ma ge ma le yrūhū yaha Yāhā sabangbāŋ wo ma yee: «Driyē laantorfa, Yāhā pe yigi pe ya koho kacān namihi ne.» ²⁰ Le maha ma le yrūhū yaha ma yee:

«Yāhā nawee laantor ter wūhū cā.
Ke cā too nde saha laa yō ye.»

²¹ Loo nde na, ye ma syi ye naa naweete myaha gboho ye! Ye sē yāā, kai- bye ma ye wān: ²² Ndo Pōl woo, Apolosu woo, Pyar woo, driyē wān woo, yrāŋ wīi woo, gbā wīi woo, yagaa wūhū woo, sukūhū gaa wūhū woo, too nde bye ma ye wān.

²³ Ye -sē ma u Yāhā Yīndefua Crise wām, u Crise -sē ma Yāhā wūū.

4

Yesu Crise tēntē-

¹ Ye yai ye cā u Yāhā Yīndefua Crise tēntē- me wo ne. Yāhā wūhū nkāy nawee- sē ke cā yāā ye,

koo wo n yar nawee- na. ² Wii u -sẽ ma Yãhã wũhũ yarfua nawee- ye, lii le ma u wĩ, u yai u sronj. ³ Le tã y ye yee ta wĩ yõ, laa na ye yee ta wĩ sã yõ ye, le tã y le pye kasãhãfa gɛ pe ra wĩ pãã ke syi dyanj, le sã kai kua ra ye ye. Ndoog ɛ sã laa pãã nii wãpee wĩ na ye; ⁴ n sã laa yãã tẽ tee pye ye. Loo sã -sẽ ne le ga ta ra n sronj Yãhã ye ye. Wii u ma ra kasãhãfua, woo kẽ Yĩnfua Yesu ne. ⁵ Loo ne, ye ma syi ye cãã naa laa pãã waa wĩ na mii le yale sã no wa ye, yaliile Yĩnfua Yesu ga ba dur ba. U ga ba wam wũhũ gbe yi gbaa na, nawee laam wũhũ bya ne. Loo na, nawee nawee woo, u ga ba u miyũhũ lay yãã Yãhã ye.

⁶ Wo nna, n wo wĩ pãã ye ye, ndoo tesẽ Apolosu ne, ma yee ye waha ke kai- war. N yee n ga wo wĩ pãã ye ye, ye n naa ye troho tãhã mii le ma le yrũhũ yaha Yãhã sabangbãnj wo mii. Ye ma syi ye naa n yee nwo wãklaha ter puar nwo wãklaha na, le n nii ye n yatanj ta yii na ye. ⁷ Ye sã yãã, yoo nawee- ta pe wee wãcɛnj pe ya ne mii Yãhã sã kẽ ye? Mboo nawee, kayĩ lii ma ma ye, mii Yãhã sã kẽ ke loo wãã ma kẽ ye? Taa -sã loo yãã, ma tee mii sey mii Yãhã sã kẽ ke le wãã ma kẽ ye.

Yatanj gboho ter Korntifa na

⁸ Ye sã yee la, a yii kai- cã yai wa, a ye ngbãnj yai wa kacãn ne, a wii ma sya yee wo wee ye, ye ga waha yahasee gbe? Ye ma nii yahasee ye ciĩnde, le yõ; ye ga waha wo bya ta wo n nii yahasee ye. ⁹ Ye sã yãã, wii Yesu tẽnlehe, le wee la mii Yãhã wii ta nawee- bye kur kue ye, mii mpãy dyanj pe yai wãboo ne? Driyẽ nge wo, pe nabuar, ma

suhu pe yāhāyīŋ tēnlēhe ne, pe yīnde ma wo na ke kai- bye wo. ¹⁰ U Yāhā Yīndefua Crise wīi ta pe n nii n yee yīŋ wee wo na ye. Yii poo -sē na, ye sē yee la ye ma laantorfa le Crise kānde wo? Fānga wee wii ye ye, yii poo -sē na, ye sē yee la fānga ma ye ye? Ye sē yee la nawee- ye myaha sey, wii poo -sē na, pe sē wo yāŋ nawee draha wo ye? ¹¹ Ma sya ba waa yagaa na, wo n fāy fāā ne, loho fāā ne, faha wān sē maha yai wo ye ye, pe wo nuhu, niisar wee wo ye ye. ¹² Wo wo yē digi yāā wii koho kasyā na. Mpāy pe wo tyehē, wo Yāhā nar ke kaa taha pe na. Mpāy pe wo nuhu Yesu Crise wīi na, wo sē n fya koo wāfāy na ye, ke ma sya pye mii. ¹³ Nawee wii ma wāpee pāā wo wīi na, wo u yē wāā n sya kayīi ne. Ma sya ba waa yagaa na, wo ma kafar wāŋ syi dyaŋ driyēfa ye, wo wīi fūhū nawee- ye.

¹⁴ N sē koo kaplāŋ ngīi yrūhū ye kē ma yee, n ga fyar yaha ye na ye. N yee n ga ye cāā yar ke kai- ne, mii waa dyaŋ u pii ne pe ntāŋ dye u tāy. ¹⁵ Ye sē yāā, mpāy pe ye klaha le Crise kānde wāyār ne, pe ma sya nawee- nyerbua tā, tuhufa buar wee ye ye ye. Tee fe dye le Yesu kānde wo, ndoo kē n cāā ye klaha le Yesu Crise kapāyīi wīi ne, koo kē ndoo kē ye tuhufua le Yesu kānde wo. ¹⁶ N ga ye nar waha nde ne, -ye ra pyer ter gbe! ¹⁷ Loo ne ta n Timuti nō wāā ye ye. U ma ta dya le Yīnfua Yesu kānde wo, u ntāŋ dye ra tāy, u n sron le Yesu tēn ne. U ga ba ye gbihi yar ta troho wātāhā ter ne le Yesu Crise kānde wo, tesē ta kaklaha ter ne Yesu kāndeyārfa yawār teebehe bye wo.

¹⁸ Ye laam wo, mpāy ta yi yataŋ ne ma n yee, a ndoo saa ka ye fla na ye. ¹⁹ Yāhā ma sya, n ga ka ye fla na, le saa ma- ye. Mpāy pe yee poo ta yi pe yataŋ ne, n sē n gaha pe kaplāŋ ya luhu ye, n n gaha yāŋ pe ma waha n yia, ma pe troho tāhā le Yesu kānde wo fānga ne. ²⁰ Ye sē yāā, Yāhā Yai wīī na, kaplāŋ koo sē kē ke ma yīŋ ye; ma waha yia, ma naa ma troho tāhā le Yesu kānde wo fānga ne, loo le ma yīŋ. ²¹ Lii loo le n tāy ye ye? N ka ye fla na ye wāpēn yīmbui ne laa, n ka ye fla na laantār ne mii waa dyaŋ u pii ne pe ntāŋ dye u tāy?

5

U kapeepyefua yai u cer yi kāā ye yawāhāfa wo

¹ Pe le pāā, a ye yawāhāfa wo tyatyāhā wīī laa ma, le wāpee! Mpāy gε pe sē cīinde Yāhā cā ye, poo kānde na le syi sē yai le pye ye. Le nde, ye laam wo, waa ma u u tuhufua cōō di. ² Loo naa byε ne, ye yataŋ gboho, ma sya ta yi. Ye ma ne pye fyar ye yigi, le n nii ye fāy, ye ne ga u tyatyāhāfua cer yi kāā ye yawāhāfa wo. ³ Ndo wo na, tē sya dey ye na, ta laam ma ye fla na. Wii tuu kapee nde pye, ndoo woofua sāhā wa wo Yīŋfua Yesu kāmāy na, mii n ma ye fla na. ⁴ Ye ma yii wāā Yīŋfua Yesu myaha na, ta laam bya ga ba pye ye nsoho wo, Yīŋfua Yesu fānga ne. ⁵ Ye ga ba u kapeepyefua cer yi kāā ye yawāhāfa wo, Setane n u fāy u kadye sraha na, u tyatyāhā laampee n sya ba pye klaha-. Loo na, u ga ba sya yaha wo Yīŋfua Yesu wādurba per.

⁶ Ye yii ka n sey ke dyaŋ, yīŋ wee le na ye ye ye. Ye cã ncasur car ya kē, ke ke bur loho bye ta ke n fua n yir busãã. ⁷ Kapee- wāpyeŋ ma mii ncasur wāŋ syi dyaŋ ke le nii nawee laam wo. -Ye ye ncasur yi kãã yii wo, ye nii mii bur loho wāfāŋ dyaŋ ke ma gbegbe, ncasur wee ke laam wo ye. Āwã, ye -sē ma gbegbe koo syi dyaŋ; ye sē yãã, pe u Yāhã Yīndefua Crise boo mpar draha wo wo kapee- wīi na. Woo kē wo syayaha gbar. ⁸ -Too naa wo syayaha gbar gbar, wo naa wo troho tãhã Yesu kãnde wo, wo wo napeer miy yaha, wo tyatyãhã ne te ma mii ncasur wāŋ syi dyaŋ! Loo na, wo ga naa wo troho tãhã Yesu kãnde wo cīinde, wo nii gbegbe mii bur loho gii syi dyaŋ ncasur wee ke wo ye.

⁹ Tē ba cãã saba wii yrūhū nō wãã ye ye, n ba le yrūhū u laam wo ma yee, -ye cēr mpāy na pe tyatyãhã pye. ¹⁰ Driyēfa mpāy pe tyatyãhã pye, mpāy ne pe yīnde yi n too nawee- wān na, pe fufordifa ne, pe mpar yahafa ne, n sē -sē yee -ye cēr pe na ye kuāŋ ne ye. Mii loo sē ne ye, ye ga waha yi kãã la pe yaha ke driyē wo? ¹¹ N ba le yrūhū ma yee, -ye cēr ye kuāŋ ne mpāy na pe pe ya ta Yesu kãndeyārfa, ma -sē tyatyãhã pye, tesē mpāy ne pe yīnde yi n too nawee- wān na, mpāy ne pe mpar yaha, pe nagblahafa ne, pe sēnwō nafããn ne, pe fufordifa ne. Ye ma n wãã naa n di ge di pe ne ye.

¹²⁻¹³ Driyēfa mpāy pe wee Yesu kãnde wo ye, ta wīi sē ne poo wāsãhã ne ye. Yãhã kē ke ga ba pe sãhã. Mpāy pe -sē ma le Yesu kãndeyārfa yawãhã fla wo ye ne, ye yai ye naa poo sãhã, -

ye naa ke kai- gbihi! Le ma le yrũhũ yaha Yãhã sabangbãŋ wo ma yee, Yãhã yee: «-Ye u napee cer yi kãã ye nsoho wo!»

6

Ye ma syi ye ga naa yii sãhã driyẽfa ye ye!

¹ Ye yawãhãfa laam wo, kai ma wii dye u Yesu kãndeyãrwai ne, u yai la u ga u sãhã kasãhãfa mpãy fla na pe sã cĩnde Yãhã cã ye? U ma ka u ne u Yesu kãndeyãrwai poo yahasee ye, koo sã puar la? ² Ye sã cã la, mpãy pe ma Yãhã wãm, poo me pe ga ba driyẽfa sãhã sukũhũ gaa laam wo? Tee -sẽ ga ba driyẽfa sãhã, ye yai ye waha naa ye kasyĩmbehe gbihi ye nsoho wo yii ya. ³ Ye sã cã la ma yee, wo n pai yãhãyiŋ tẽnlehe sãhã sukũhũ gaa laam wo? Ye -sẽ pye mii ye saa waha driyẽ nge kai- gbihi ye? ⁴ Kai ma -sẽ dye ye nsoho wo, driyẽ nge kasyĩmbehe wĩ na, ye tee n gaha kasãhãfa mpãy fla na pe sã cĩnde Yãhã cã ye. ⁵ Loo nde yĩntaha kã, ye laam wo, laantorfua waa wee wii syi tuu ga waha kai war yi u Yesu kãndeyãrwai nsoho wo ye. Fyar yai te ye yigi! ⁶ Tee kai- pãã n taha yii na, le sã yõ ye. Ye tee maha n gaha ke kai- ne kasãhãfa mpãy fla na pe sã cĩnde Yãhã cã ye, loo cã pee.

⁷ Tee yii yee ga n sãhã kasãhã yĩŋfa fla na, loo nde ma wa wãpee ye wĩ na. Waa ma kapee laa ter pye ye na, ye tyii le n kua kãã ye laam wo gbegbe, kayĩ ne. Waa ma ye koho kla gaa gbe, -ye yaha le le n kua kãã ye laam wo gbegbe, kayĩ ne. ⁸ Le -sẽ nde, yii ge me tee kapee- pye ye nampyeŋ- na, ma maha pe koho wãn gbe. Ye

Yesu kãndeyãrwai ge me tee nde pye pe na. ⁹ Ye sê cã la ma yee mpãy pe kapee- pye, pe saa ba yãã dye Yãhã yai klo wo ye? Ye ma n yii kar yaha le ne ye: Mpãy pe tyatyãhã pye, ma suhu mpar yahafa ne, tesê cayɔr lefa ne, tesê mpãy ne pe n sãy pe naawai ne, pe cawai ne, ¹⁰ tesê fufordifa ne, tesê mpãy ne pe yĩnde yi n too nawee- wãn na, tesê sẽnwo nafãan ne, mpãy ne pe pe nampyeŋ- laam war, mpãy ne pe ma yuhunaboofa, poo mii bye saa ba yãã dye Yãhã yai klo wo ye. ¹¹ Ye laam wo, mpãy pye ke syi. Ye kapee- sê yee laha kãã ye na, ye nii Yãhã wãm, ye sron Yãhã yĩnde na Yĩnfua Yesu Crise kãmay na, tesê Yãhã Yrã Fãnga kãmay ne.

Ye kadye ma Yãhã niisaha

¹² Pe n yee, a nawee laam wũhũ bye wãpyeŋ kãnde ma u ye. Cĩnde ne, ke bye sê -sê kē ke yõ ye. Nawee laam wũhũ bye wãpyeŋ kãnde ma sya pye u ye, u sê -sê yai u nii u laam wĩ laa yãmpuai ye. ¹³ Pe n yee, a dir ma laha myaha na, laha ma dir myaha na. Tee -sê le cã ye yee, Yãhã ga ba te bye wĩ kua. Nawee kadye sê -sê nii tyatyãhã myaha na ye. Nawee kadye ma Yĩnfua Yesu myaha na; tesê Yĩnfua Yesu ma nawee kadye myaha na. ¹⁴ Yãhã fãngangbãŋ kãmay na, ke ba wo Yĩnfua Yesu ta u n yir gbã wo, ma dur ba yrãŋ na gbaafa ye mii, ke -sê ga ba wo kadye ta ke n yir gbã wo, ke nii yrãŋ na koo syi.

¹⁵ Ye sê cã la ma yee, ye kadye ma Yãhã Yĩndefua Crise kadye teebehe nkãy? Ye kadye ke -sê ma u Crise kadye teebehe nkãy, ye sê yai

syi syi ye ke wãã le canaandi kadye ne ye. ¹⁶ Ye sê cã la ma yee, mboo wii ma ka canaandile ye, mboo tesê woo ne, ye ga wãã le, ye nii kadye nen? Loo syi ne le yrũhũ yaha Yãhã sabangbãñ wo ma yee: «Naa ma suhu cɔɔ ne, pe ma pe ya gbe, pe ga nii kadye nen.» ¹⁷ Wii ma -sê wãã le Yĩñfua Yesu ne, u ga nii laantee nen na Yesu ne.

¹⁸ -Ye naa n fã tyatyãhã na! Kapee- nkãy ter ma ke pee, ke sê -sê laa pye nawee kadye sraha na ye. Wii u -sê tyatyãhã pye, u le pye u ya koho kadye sraha na. ¹⁹ Ye sê cã la ma yee, ye kadye ma Yãhã Yrã Fãnga niisaha? Yãhã le wãã ye kē, le ma ye nanem bye laam wo, ye wee yii wãm ye. ²⁰ Ye sê yãã, tee par sya yẽ gii na kacãn wee ke na ye. Koo yẽ kē Yesu Crise ntãñ wãwoo ne. Ye tyii ye kadye pyer n ta, nawee- n naa Yãhã sey!

7

Cɔɔ wãsyã wĩ, naa wãgbe wĩ ne

¹ Tee ba saba wii yrũhũ nɔ wãã ra kē, ye ba ra yey kai- nkãy ne. N ga koo kai- yĩntaha yar ye na. Ndoo ye, naa ma yee u sê cɔɔ gbe ye, koo puar.

² Tyatyãhã wĩ na, naa -sê yai u cɔɔ sya, cɔɔ -sê yai u nii puai ye. Loo ga waha ta tyatyãhã wũhũ saa naa n pye ye. ³ Naa yai u naa u cɔɔ wĩ pye, cɔɔ bya -sê yai u naa u puai wĩ pye. ⁴ Cɔɔ kadye wee u ya wãñ ye, ke ma u puai wãñ. Puai kadye wee u ya wãñ ye, ke ma u cɔɔ wãñ. ⁵ Cɔɔ tesê naa ne, ye ma n naa n tyii yii na ye! Ye -sê ga waha pãã ta ye tyii yii na plii raa nsoho wo, ye draha yãã ye pãã ma- Yãhã ye. Loo kur ye, -ye dur nii yii ne, mii loo sê ne ye, tee saha yia yii

na ye, Setane ga waha yia ye na, u ye ta ye n ga tyatyāhā pye kue ngaa ye. ⁶ Tē ye yar lii ne, n sē yee fānga wīi ne ye. Le ma yai wii ye, u ga waha le pye. ⁷ Coo wee ra ye ye. Nawee- ma ne pye ta wāŋ syi dyaŋ, loo le yō. Yāhā ke -sē fānga tii wāā nawee- kē, te ma te ya wuhu na. Nwo ma fānga gaa ne, nwo fānga ter -sē ma ke ya ya.

⁸ Mpāy pe ma naandar, tesē mpāy ne pe ma cabelar, ma suhu calangusyam ne, pe ma kuee ta wāŋ syi dyaŋ pe ya ya, loo le yō. ⁹ Pe ma -sē yee pe saha yia pe ya na ye, pe pe ya sya, pe nii pe ya ye. Koo puar, pe kuee ke dyaŋ le n naa pe fāy.

¹⁰ Yīnfua Yesu kānde nde yar ra na ma yee, coo ma pye puai ne, u sē yai u u puai sye ye. ¹¹ Tesē, coo ma u puai sye, u -sē nii ke dyaŋ, u ma n naa waa gbe ye. Mii loo sē ne ye, u yai u ga wāā le u puai ne. Tesē, naa sē yai u u coo sye ye.

¹² Ndoo yē kaplāŋ kē tē ga pāā yagaa. Yesu kāndeyārfua waa ma pye coo ne, coo wii u sē Yesu ta u Yater ye, u coo ma yee u ga kuee u ne, u ma syi u u coo sye ye. ¹³ Yesu kāndeyārfua ma pye puai ne, puai wii u sē Yesu ta u Yater ye, u puai ma yee u ga kuee u ne, u ma syi u u puai sye ye. ¹⁴ Ye sē yāā, puai wii u sē Yesu ta u Yater ye, u coo tuu -sē ma Yesu kāndeyārfua, u coo kāmāy na u crā Yāhā na. Tesē, coo wii u sē Yesu ta u Yater ye, u puai tuu -sē ma Yesu kāndeyārfua, u puai kāmāy na u crā Yāhā na. Mii loo sē ne ye, pe kicar ga nii mii mpāy dyaŋ pe sē cīinde Yāhā cā ye; pe -sē mii pe crā Yāhā na pe seefa nen kāmāy na, pe seefua wii u ma Yesu kāndeyārfua. ¹⁵ Puai wīi na, u coo ne, wii u sē Yesu ta u Yater ye, woo ma yee u ga u nampyeŋ sye, le ga waha pye. Loo

nde na, laa wee pe nsoho wo nantāŋ ye. Wii u ma Yesu kāndeyārfua u tefay yāã. Yāhā wo yee wo nii wii ne yīmbui nen na, yrīŋ ne. ¹⁶ Ma sē yāã, mboo naa, ma saha le cā ma yee ma ga waha ma cɔɔ ta u n dye Yesu kānde wo, u wāsyayaha yāã ma wāŋ syi dyaŋ ye. Ma sē yāã, mboo cɔɔ, ma saha le cā ma yee ma ga waha ma puai ta u n dye Yesu kānde wo, u wāsyayaha yāã ma wāŋ syi dyaŋ ye.

-Ye kuee draha gii wo tee pye Yāhā n ba ye yee!

¹⁷ Lii le ma yīŋ, tee pye draha gii wo Yāhā n ba ye yee, -ye kuee koo draha wo; loo ma Yīŋfua Yesu laam wīī. Loo kānde nde ne tē n yar Yesu kāndeyārfua yawāhāfa bye na, teebɛɛ bye wo.

¹⁸ Wii ma pye u ba kũũ ɛ wa Yāhā n ba u yee, u ma syi u yee u ga dur u u ya ta mii u sē kũũ ye. Wii ma pye u sē kũũ ye Yāhā n ba u yee, u ma syi u yee u ga u ya ta mii u kũũ ye. ¹⁹ Ma kũũ woo, yīŋ wee le na ye; ma sē kũũ woo, yīŋ wee le na ye. Lii le ma yīŋ, ma naa n sroŋ Yāhā kānde katan wāyār ne. ²⁰ Taa pye draha gii wo Yāhā n ba ma yee, kuee koo draha wo! ²¹ Ma'a pye yāmpuai Yāhā n ba ma yee, ma'a syi ma naa laam ga ma yāmpar wīī na ye. Ma'a -sē ga waha yi le wo, ma yi! ²² Yāŋ, yāmpuai wii u yee Yesu kānde wo, Yīŋfua Yesu u yi wa u kapee- wāpyeŋ yāmpar wo. Wii u wee yāmpuai ye, u ma yee Yesu kānde wo, u ma Yesu yāmpuai. ²³ Ye bye, ye par sya yē gii na kacān wee ke na ye. Koo yē kē Yesu Crise ntāŋ wāwoo ne. Loo na, ye ma syi ye nii nawee- laam wũhũ yāmpa ye!

²⁴ Wo nna, ye nanem bye tee pye draha gii wo Yāhā n ba ye yee, -ye kuee koo draha wo Yāhā yaha ye!

Naandar wī, cabelar wī ne, tesē calangusyam wī ne

²⁵ Ye ba ra yey naandar wī na, tesē cabelar wī ne. Yīnfua Yesu sē kapān laa yar ra na poo wī na ye. Tuu -sē yō ra na, ma ra ta ta n sron, n ga waha ta laam wī yar ye na ye kayey nde wī na.

²⁶ Kayīhī nihi ter yagaa. Loo nde wī na, lii le yō ndoo ye, le puar naa na u kuee ke dyan.

²⁷ Ma'a pye cō ne, kuee u ne! Ma'a yee ma wee cō ne ye, ma'a syi ma waa sya ye! ²⁸ Ma'a cō sya, kapee sē ne ye. Capua ma nii puai ye, kapee sē ne ye. Pe ma pe ya sya, wāfāy ga ba naa pe dye, n -sē n traha n wāfāy nge kuā ter pe na.

²⁹ Wo nna, lii tē ga pā ye ye, loo ne nde: Yale sē gboho kuee wo ye nantān driyē nge wo ye. Ma gbe yagaa na, mpāy pe ma ca ne, pe pe laam miy yaha mii mpāy dyan ca wee pe ye ye. ³⁰ Mpāy pe ma miyāhā na, pe nii pra mii mpāy dyan pe wee miyāhā na ye. Mpāy pe ma nuhu na, pe pe ya ta mii mpāy dyan pe wee nuhu na ye. Mpāy pe ma klafa, pe pe ya ta mii mpāy dyan pe wee klafa ye. ³¹ Mpāy pe ma driyē kai- yahasee ye, pe pe ya ta mii mpāy dyan pe wee driyē kai- yahasee ye ye. Ye sē yāā, wākueeyaitān wee driyē kai- na ye.

³² N n traha ye ma syi ye naa laam ga ye. Cō wee wii ye ye, u laam ga Yīnfua Yesu wī na, u ga pye mii u pyer n naa n tāy Yīnfua Yesu ye. ³³ Cō ma pye wii ye, u laam ga driyē nge wān na, u ga pye mii u pyer n naa n tāy u cō ye. ³⁴ U laam

ma fle sñ. Tesē, cōō wii u wee puai ye ye, capua wii ne u wee puai ye ye, pe laam ga Yīnfua Yesu wīī na, pe ga pye mii pe pyer n naa n tãy u ye. Pe n kε pe kadye ma suhu pe laam wūhū ne, te naa n laha. Wii u ma puai ye, u laam ga driyē nge wān na, u ga pye mii u pyer n naa n tãy u puai ye. ³⁵ N n traha ye kayūhū yāā, koo kē ta n ye yar kai- ngīī ne. Le sē nii mii fānga wīī laa ne ye. N n traha ye naa ye troho tãhã kãnyīī wo, ye ye laam gbihi ta, ye naa n nii Yīnfua Yesu myaha na.

³⁶ Yagaa, naanfuē syi tuu ma capua ne, u ga waha le ta u yee, woo saa u sya ye. Kur kuε ye, u naanfuē ma ba yee woo tee pye u capua na, u ma maha yee u saha yia naandar na ye, ma yee woo ga u capua sya, le ga waha pye. Kapee sē ne ye. ³⁷ Wii ma -sē yee, woo saa cōō sya ye, woo ga kuee naandaha, le ma pye u ya laam wīī ne, waa yē kapān sē ne tuu luhu ye, u ma cã u ga waha yia u ya na, u ma kuee naandaha, loo yō. ³⁸ Loo na, naanfuē tuu kicar yigi, u ma ba u sya cōō, le yō. Wii ma -sē ba sye, u sē u wūū sya cōō ye, ma kuee naandaha, loo cã maha yō.

³⁹ Cōō wii puai ma pye yrāñ na u sē ku ye, u cōō yai u kuee u puai ye. U puai ma -sē ba ku u yaha, u ga waha nii puai waa ye. Le -sē yai le pye Yesu kãnde na. ⁴⁰ Ū cōō ma -sē kuee ke dyan calangusya, le ga puar u na. Lii le ma ra ye, loo ne nde: Ta laam wo, n yee Yãhã Yrã Fānga kē ke loo yar ra na.

Wãn tii pe boo mpar wãn na

¹ Ye maha ba ra yey wãn tii wĩ na pe boo mpar wãn na. Tee le pãã mii, wo bye kacãn yãã. -Tee -sẽ le cã ye yee, wii ma u ya ta kaicãfua, yatan ma ufua na. Wii ma -sẽ yee u nampyen- ntãñ dye u tãñ, u koho le pe ye pe laantor wãyãã ne.

² Wii ma u ya ta kaicãfua waa syi ter, ufua sã cĩinde laantor yãã wa ye. ³ Wii ma -sẽ yee Yãhã wĩ gboho u laam wo, ufua cĩinde laantor yãã, Yãhã woo cã yõ.

⁴ Ye ra yey ma yee wãn tii pe boo mpar wãn na, Yesu kãndeyãrfua ga waha te kaa laa, u saha te kaa ye. Wo cã ma yee Yãhã neñ ya kã ke ma, mpar wãn wee ngaa ye. ⁵ Nawee- mpãy ma sya plaha ma n yee, a yãhã busãã ma, yĩñfa busãã ne yãhãyĩñ na kãntraha ne, ⁶ wo cã ma yee Yãhã neñ ya kã ke ma; koo kã wo bye Tuhufua. Kai- bye yir koo ye, wo bye ma koo wãm. Yĩñfua nen ya kã u ma; woo kã Yesu Crise ne. Kai- bye tãhã woo kãmay na, wo bye n poho woo kãmay na.

⁷ Too kacãn nde wee Yesu kãndeyãrfa bye ye ye. Mpãy ma pe sã cẽr wa mpar wãn na ye. Loo na, poosyifa ma mpar wãn kar kaa, pe laam saa sya ye, pe ga naa pe ya yãñ mii pe tee pye, pe wee gbegbe ye. ⁸ Kar saha nawee ta u n crã Yãhã na ye. Wii ma yee u sã te kaa ye, laa kayĩ sã ne le ter u yaha ye. Wii ma te kaa, laa kayĩ sã ne tuu ga yãã ye. ⁹ -Tee -sẽ yii yigi, lii tee cã ma n pye, le ma syi le mpãy ta pe n dye kãmpee wo ye, mpãy pe sã wlaha le Yesu kãnde wo ye! ¹⁰ Poo nen waa syi ma ma yãã, mboo wii taa ma kaicãfua, ma maha nii kar kaa mparyaha kangbãñ wo, u saha le war

ye. U laam wo kapee ne. Tuu -sē ma yāã le na, u bya ga dye le wo, u naa te mpanyaha wān kar kaa. ¹¹ Loo nde na, u Yesu kāndeyārwe nwo wii u sē wlaha le Yesu kānde wo ye, mboo kacān ta u n dye kāmpee wo. Le -sē nde, u Yāhā Yīndefua Crise ku woo bya wīi na. ¹² Ye Yesu kāndeyārwei mpāy pe sē wlaha le Yesu kānde wo ye, ye ma tee n pye pe na, ma pe laam wlāhā, ye kapee pye u Crise ge na ke syi ne.

¹³ Loo ne, tē cā n ma nii mpar wān kar kaa, ta Yesu kāndeyārwe ma ra yāã, le ga u laam wlāhā, u n dye kāmpee wo, n ga yi kāã too syi kar nde wākaa wo ta kuāŋ ne; n ma syi n ba ra nampyeŋ waa ta u laam n wlāhā u ye, u n dye kāmpee wo ye.

9

Pɔl yee Yesu ge kē u woo lɛhe wāã

¹ Ta laam wee la pra driyē nge kuɛ ye? N wee la Yesu Crise tēnlɛhe? N sē wo Yīnfua Yesu yāã la yīnde ne? Ndoo sē na tē Yīnfua Yesu tēn tē ye fla na, ma ye ta ye n nii Yesu kāndeyārfa? ² Mpāy ter ma sya yee ndoo wee Yesu tēnlɛhe ye, yii poo yai ye cā ye nii Yesu kāndeyārfa ndoo kāmāy na. Loo nde le yar, n ma Yīnfua Yesu tēnlɛhe.

³ Mpāy pe ra wāpee pāã, tē ga lii yar pe na, le nde: ⁴ Too ma wo tēn na, wo bya sē yai la wo wo yē digi yāã, tesē wo lawoŋ ne? ⁵ Wo sē yai la le ma tāy wii ye, u Yesu kāndeyārweisya waa ta u cɔɔ, u n naa n taha u na u tēn na, mii Yesu tēnlɛhe mpāy wāŋ syi dyaŋ, tesē u Yīnfua Yesu cīifa ne, tesē Pyar ne? ⁶ Wii wo syām ya la ta

tëntēwe Barnabaase ne, too yai wo naa tēn tē, wo cã naa wo yě digi yãã? ⁷ Ye le luhu yãã la pe yee, nawee ma dye seraasyiya wo, woo tuu u ya dãã u ya ya? Laa, nawee ma katyir tar le, u sē yai u te katyisan di ye? Laa, yanaha tuu yar tii naha, u sē yai u too nayĩm wo ye?

⁸ Ye ma syi ye yee naweete laam wũhũ kē tē n pãã ye ye ye! Yãhã kãnde katan ɣe koo ngĩ yar. ⁹ Ye sē yãã, kãnde lii Yãhã bii le le soho Musa koho wo faale wo, le fla ngaa le yar ma yee:

«Pe naha gii ta ma yee
ke dir pua tãhã naa n yi te syir wo,
pe sē yai pe koo naha yě pua tã
too dir nde na ye.»

Ye yee la, yar ya wĩ ne Yãhã bii naa n pãã koo fla na? ¹⁰ Wii bya sē na Yãhã naa n yãŋ, wii mpãy too ma ke tëntē-? Āwã, le kapãn nde pãã wii ɣe wĩ na. Wii u tar war, tesē wii ne u te dir sege ma u pua yi, pe bye pe tēn tē, ma yee pe ga ba pe dir lay yãã. ¹¹ Wo le Yesu kapãyĩ pua tãhã le ye laam wo. Loo nde na, wo sē yai la wo -sē ye koho wãn taa yãã ke draha wo? ¹² Mpãy ter ma, pe ye koho wãn taa sya ye ye. Wii poo sē cã yai la, wo ye koho wãn yãã, wo ta ter poo yaha? Wii sē -sē wo dããn yey yãã ye ye ye. Wo yer wãfãy ter bye wãsyãŋ na, ma yee wo saa laa ta lii syi le ga waha yer tã le Yãhã Yĩndefua Crise kapãyĩ wãkaŋ na yaha ye ye.

¹³ Ye sē cã la ma yee, mpãy pe tēn tē Yãhã kangbãŋ wo, pe yě digi n yi koo fla na? Mpãy pe tēn tē Yãhã diŋ yisaha wo, pe ne pe lay yãã ke diŋ na. ¹⁴ Yĩŋfua Yesu ɣe maha le yar ma yee,

mpây pe ma le kapâyĩ pããfa, pe yai pe naa pe dãã loo tẽn na. ¹⁵ N sê -sê ta tẽn dããn wĩ yey yãã waa ye ye. N sê maha saba nwo yrũhũ nɔ wãã ye ye ma yee, n ga ye yey loo ne ye. Loo nde ma ta ye miyũhũ. N ma sya ga ku loo wĩ na, n ga yer le na. ¹⁶ Tẽ sya le kapâyĩ pãã, n saha nii sey loo wĩ na ye. Ye sê yãã, n taha loo tẽn nde na; n ma sye n sê le kapâyĩ pãã ye, ta wĩ ga pee. ¹⁷ N ma le tẽn tẽ yõ nuhu ne, n ga le dããn yãã. Le ma -sê nii mii tẽn dyaŋ pe ra taha le na, n yai n le tẽ wãtẽ ya. ¹⁸ Ta dããn -sê ma lii ne? Loo ne, n naa le kapâyĩ pãã nawee- ye faa, n ma n naa le tẽn dããn sya ye.

¹⁹ Tẽ sya ma pra, n wee waa yãmpuai ye, n nii ta nawee- ter byɛ yãmpuai draha syi wo. Loo na, n ga waha nawee- busãã yãã, pe n dye le Yesu kãnde wo. ²⁰ Tẽ pye Yiiffee- nsoho wo, n ba nii ta pe wãŋ syi dyaŋ. Loo ga ta ra n pe yãã pe n dye le Yesu kãnde wo. Mpây pe Yiiffee- kãnde yãr, tẽ pye pe nsoho wo, tẽ sê -sê wee n pe kãnde yãr ye, n ba nii ta pe wãŋ syi dyaŋ. Loo ga ta ra n pe yãã pe n dye le Yesu kãnde wo. ²¹ Mpây pe wee Yiiffee- ye, pe sê Yãhã kãnde yãr ye, tẽ pye pe nsoho wo, tẽ -sê ma Yãhã kãnde wo, ma Yesu Crise kãnde yãr, n ba nii ta pe wãŋ syi dyaŋ. Loo ga ta ra n pe yãã pe n dye le Yesu kãnde wo. ²² Mpây pe sê wlaaha le Yesu kãnde wo ye, n ba nii ta pe wãŋ syi dyaŋ. Loo ga ta ra n pe yãã, n pe ta pe n wlaaha le Yesu kãnde wo. N naa nii ta nawee- ter byɛ wãŋ syi dyaŋ, ma yee le ma sya klaha mii, nanem mpây ga wãsyayaha yãã pe laam wo. ²³ N kai- byɛ pye le kapâyĩ wĩ na,

ma yee ta bya ga ba ta lay yãã.

-Ye yii plāhā, ye yahasee fla yãã le Yesu kānde wo!

²⁴ Ye cā ma yee, mpāy bye pe pe ya kihi fee ne nantrangbāŋ fla wo, pe bye n fā, nen ya -sē kē tuu ga yahasee fla yãã pe laam wo, u dāān yãã. Yii mpāy tee -sē ma le Yesu kānde wo, -ye yii plāhā ye yahasee fla yãã le laam wo! ²⁵ Mpāy bye pe n pai le fee fā, pe ga cāā naa pe ya gbihi, pe naa pe ya plāhā kai- bye ne. Pe ga naa koo bye pye pe ba waha yahasee fla yãã, pe te dāān yãã. Pe dāān -sē pye driyē kla, ke ga ba klaha-. Wii mpāy too -sē ma le Yesu kānde wo, wo ma yahasee fla yãã, dāān tii too ga yãã, driyē kla sē kē koo ne ye, koo ma wāklahayāā wee ke na ye. ²⁶ Loo ne, ndoo ra fee fā le Yesu kānde wo, ma yahasee fla wīi ya yāŋ. N maha ma mii mpāy dyaŋ pe pe ya sugu kāntakloŋ ne; ndoo sē -sē sugu faa n laa ye. ²⁷ N n yia ta kadye na, n ta kadye wāyigi cā. Mii loo sē ne ye, ndoo wii n nawee- klaha le Yesu kānde wāyār ne, n ga ba kuee kur ye.

10

Ye ma syi ye Yiifee- wāle wāŋ syi pye ye!

¹ Wo nna, ye ma syi ye faha wo faale wāle wīi na, pe pye yrāhā na tēyāfūū klo wo, wo faale wādyaha Musa ne ye. Yāhā bii yāhāsyōr raa ta pe yīŋ na, pe bye n naa n taha too yāhāsyōr na. Yāhā bii pe ta pe bye n waha dye yi ter muhulangbāŋ telai wo, loho sē nō ge nō pe na ye. ² Te yāhāsyōr wīi, ke muhulangbāŋ wīi ne, le bii nii pe bye ye wātāā gaa dyaŋ Musa myaha

na. ³ Digi gii ke pye pe ye, pe bye n naa n di, ke naa n yir yāhāyīn na. ⁴ Yāhā naa loho ta ke n naa n yi ntēmbangbān gaa wo, pe bye n naa n wo. Koo ntēmbangbān wīi bii nii mii Yāhā Yīndefua Crise dyaŋ, tuu pye pe ne, ma naa n taha pe na. ⁵ Loo naa bye ne, pe nawee- fānga busāā sē naa n luhu Yāhā ye ye, ma ku le tēyāfūū klo wo.

⁶ Koo kai- ngīi ke wo klaha kai- busāā ne, wo ma syi wo nii wo wāle wān syi dyaŋ, wo naa wo lampee wūhū ke ye. ⁷ Ye ma syi ye nii poo mpāy wān syi dyaŋ ye naa mpar wān tēn ye. Le ma le yrūhū yaha Yāhā sabangbān wo pe wīi na ma yee: «Pe nawee- tege nii, ma di, ma wo. Loo kur ye, pe n yir, ma gbar.» ⁸ Ye ma syi ye dye tyatyāhā wo ye, mii wo wāle mpāy dyaŋ pe bii pe ya le le wo. Nawee- nyer sēnsye nen yīibua n sya bii ku pe laam wo, per neŋ loo nde wīi na. ⁹ Ye ma syi ye Yīnfua Yāhā tān yān ye, mii poo mpāy dyaŋ pe bii le syi pye le tēyāfūū klo wo. Yāhā n nwɔr ta te n nabuar nɔ boo pe laam wo. ¹⁰ Ye ma syi ye tee naa pāā Yāhā wīi na ye, mii wo wāle mpāy dyaŋ pe bii le syi pye. U gbāfua n bii pe boo.

¹¹ Koo kapee- ngīi ke wo wāle dye, ke wo klaha kai- ne. Ke yrūhū yaha Yāhā sabangbān wo wii wīi na, wo waha wii wāyigi cā, wo ma syi wo naa n pye pe wān syi dyaŋ ye. Ye sē yāā, wo ma cāā gii na yagaa, driyē kuayale gbe taha. ¹² Loo nde na, wii ma yee woo wlaha yɔ le Yesu kānde wo, u naa u ya yigi, u ma syi u ba tra yi kāā le wo ye. ¹³ Fānga gii ke ye tyīn n gaha kapee- wāpyeŋ kue ye, ma sya ba waa yagaa na, ke ga waha nawee- bye dye. Yāhā yē ter koho wāleŋ

ne wo ye, ke n sron, ke saa sya koo fānga nge n ter nawee fānga na ye. Koo fānga nge ma nii ye tyīn n gaha kapee- wāpyen kuε ye yaliile wo, loo yale wo, Yāhā ga fānga gaa wāā ye kē ye n waha yia, ke maha ye ta ye n yi le wo.

¹⁴ Ta tāāfa, loo nde na, ye ma syi ye naa mpar wān tēn ye! ¹⁵ Tee ma kaicāfa, lii tē n pāā, -ye yān le le wo! ¹⁶ Wo ma wii wāā, ma nii defīī wāā n wo sekui wo, syaha wāwāā wīī na Yāhā kē, loo yīntaha kē nde: Wii mpāy byε too wāā wo, wo byε seefar le u Yāhā Yīndefua Crise ntōr kāmāy na. Wo ma bur la cεr, ma nii wāā n di, loo yīntaha kē nde: Wii mpāy byε too wāā di, wo byε seefar le u Crise kadye kāmāy na. ¹⁷ Bur neŋ ya kē ke ma. Too sya nihi mii koo bur na, wo byε wāā le, ma nii mii kadye nen dyan. Ye sē yāā, bur neŋ ya kē wo byε too wāā n di. ¹⁸ Ye maha cā ma yee, wān tii Yiisrēfa pe boo, ma diŋ yi Yāhā kē, mpāy pe too wān kaa, pe seefar le ke Yāhā diŋ yisaha fla ne.

¹⁹ N sē -sē yee pe ma wān boo mpar na, yīn ma too mpar na, tesē wān tii ne pe boo ye. Aye, le wee ke syi ye. ²⁰ N yee, wān tii pe boo mpar na, te ma sāndāpee wān, Yāhā wān sē ne ye. N sē -sē n traha ye naa too wān nde kaa, ye seefar le sāndāpee ne ye. ²¹ Ye saha naa n wo Yīnfua Yesu sekui ne, -tee maha ga naa n wo sāndāpee sekui ne ye. Ye saha naa Yīnfua Yesu dir di, -tee maha ga naa sāndāpee dir di ye. ²² Wii ma loo pye, le sē sron Yīnfua Yāhā ye ye, le saa tāy ke ye ye. Ye yee la ye fānga ter Yāhā wān yaha?

-Ye naa Yāhā miingbān ke ye kānkai- byε wo!

²³ Mpāy n yee, a kai- bye wāpyeŋ kānde ma nawee ye. Cīnde ne, kai- bye sē -sē yō ye. Kai- bye sē maha kē ke laa yō Yesu kāndeyārfa kē ye. ²⁴ Waa ma syi u naa u ya diŋ wīi loo kar ye. Lii le ga nii kayīi u nampyeŋ- bye ye, u naa loo ke.

²⁵ Kar rii bye pe n par kar parsaha wo, ye ga waha te bye kaa. Loo kur ye, ye ma syi ye -sē waa yey te kar yisaha ne ye! Mii loo sē ne ye, laa na ye laam saa sya ye ye ye. ²⁶ Ye sē yāā, le ma le yrūhū yaha Yāhā sabangbāŋ wo ma yee: «Driyē nge ma suhu ke wān bye ne, te ma Yīŋfua Yāhā wān.» ²⁷ Wii u wee Yesu kānde wo ye, woosyifua ma ye yee dir na u kaha wo, le ma tāy ye ye, ye ka. Pe ma dir rii wāā ye kē, ye te di. Ye ma syi ye -sē waa yey nwa syi dir ne ye! Mii loo sē ne ye, laa na ye laam saa sya ye ye ye. ²⁸ Waa ma -sē ye cāā yar ma yee, mpanyaha kar ne pe soho, woofua wīi na, ye ma syi ye te dir di ye! Ke syi, waa laam saa wlāhā u ye ye. ²⁹ Ye laam ma sya yee pe sē wlāhā ye ye ye, wii u te mpanyaha kar wīi pāā ye ye, woo laam ga waha wlāhā u ye. Laa na, waa ga yee, a woo kalaa ma la waa ter laam wāwlāhā wīi ya na, a woo sē yai la u waha u ya laam wīi pye, ³⁰ a woo ma cāā syaha wāā Yāhā kē te dir wīi na, nwa pe n ga maha yee woo tee pye te dir wādi wīi ne?

³¹ Loo nde na, digi kē tee n di woo, ngaa kē tee n wo woo, ngii ngii tee n pye woo, -ye naa Yāhā miingbāŋ koo ke ye kānkai- bye wo! ³² Mpāy pe ma Yiifee-, mpāy ne pe wee Yiifee- ye, mpāy ne pe ma Yesu kāndeyārfa yawāhāfa, ye ma syi ye ta ye wīi n nii pe ye ntēmlaha gii syi dyaŋ pe

n kũn ke na, ma n too ye! ³³ -Ye naa n pye ra dyaŋ! N nii plãhã, ma n ke ta wĩĩ n naa n tã y nawee- bye ye, ta kãnkai- bye wo. Nii wĩĩ sē ne tē n kar ye, nawee- bye kayĩĩ ne tē n ke pe kē, pe n wãsyayaha yãã.

11

¹ Tē n yãŋ u Yãhã Yĩndefua Crise na mii, ye bye ye naa n yãŋ ra na ke syi, -ye ra pyer gbe!

Coo yai u naa u ya yigi mii

² Ye sē n faha ra wĩĩ na kãnkai- wo ye. Tesē, tē ye klaha kai- nkãy ne, ye ke pye. N ye sey koo ngĩĩ wĩĩ na. ³ N -sē n traha ye maha nde cã taha: U Crise woo u ma naa yĩŋfua, naa woo u ma u coo yĩŋfua, Yãhã koo -sē ma u Crise yĩŋfua.

⁴ Yawãhã fla wo, naa ma nii n pãã Yãhã ye, laa na Yãhã ke kapãn laa le u laam wo, u n nii le tōr pe yawãhãfa ye, u ma -sē pye u u yĩŋ tã tã ngaa ne, u u Yĩŋfua Yesu myaha klaha- ke syi ne. ⁵ Le ga waha pye coo kē tuu n pãã Yãhã ye ke yawãhã fla wo, laa na Yãhã ke kapãn laa le u laam wo, u n nii le tōr pe yawãhãfa ye. Woo ma pye u sē u yĩŋ tã tã ngaa ne ye, u u puai myaha klaha- ke syi ne. U ma wãcɛŋ coo wii ne u yĩŋ bye kur kãã.*

⁶ Coo wii ma yee, u sē u yĩŋ tã n tã ngaa ne ye, u yai u yĩŋ kur kãã. U ma -sē cã ma yee, yĩŋ wãkur wĩĩ ma fyaryigi wĩĩ, u -sē ke tã naa n tã ngaa ne.

⁷ Naa woo na, u sē yai u u yĩŋ tã naa n tã yawãhã wo ye, Yãhã woo ta u n ke tay, koo kē. Naa woo u ga waha Yãhã myaha gboho. Coo woo

* **11:5** 11.5 Coo wii pe u yĩŋ kur kãã, canaandile kē Korntifa ye koo cãã na.

-sē kē u ga waha u puai myaha gboho. ⁸ Ye sē yāā, Yāhā sē cɔɔ tāhā ma u teelaa yi ma naa tāhā ye. Naa woo kē Yāhā u tāhā, ma u teelaa yi ma cɔɔ tāhā le ne. ⁹ Tesē, Yāhā sē naa tāhā cɔɔ wīī na ye, cɔɔ woo kē Yāhā u tāhā naa wīī na. ¹⁰ Loo ne, cɔɔ yai u ngaa tā naa n tā yīŋ na yawāhā wo, pe n cā u yīŋ kor le u puai ye. Yāhāyīŋ tēnlehe ma loo yāā, le n tāy pe ye. ¹¹ Too -sē ma Yīŋfua Yesu kānde wo, naa wīī ma cɔɔ na, cɔɔ wīī bya ma naa na. ¹² Ye sē yāā, Yāhā ke naa teelaa yi ma cɔɔ tāhā mii, Yāhā maha ta, naa see n yi cɔɔ wo koo syi. Koo kai- bye yir Yāhā ye.

¹³ Yii ge, -ye le waha yāŋ! Le sron la cɔɔ u naa n pāā Yāhā ye yawāhā wo, mii u sē u yīŋ tā tā ngaa ne ye? ¹⁴ Naa u ma mii, u ma u yīnyor ta te n tyīī ga far ter, le ga nii fyaryigi wīī. ¹⁵ Cɔɔ woo -sē nwo, u ma u yīnyor ta ke syi, le ga nii myaha ne. Ye sē yāā, cɔɔ yīnyor n tyīī, ma u yīŋ tā n tā. ¹⁶ Kaplāŋ wātyīn wīī ma pye wii laam wo yīŋ wātā wīī nde na, u cā wācāŋ ya u yee, wii tesē teebehe bye Yesu kāndeyārfa yawārfa ne, troho wātāhā gaa ter wee wo ye ye.

Yīŋfua Yesu digi wādi

(Mat 26.26-29; Mar 14.22-25; Luke 22.15-20)

¹⁷ Kai- nkāy tē ga pāā yagaa ye wīī na, n saha ye sey ke wīī na ye. Ye ma yii wāā, ye sē kayūhū pye ye, ye kapee- koo kē ke cā pee n gaha ye ye. ¹⁸ Pe ra cāā yar ma yee, ye ma yii wāā yawāhā na, ye yīmbuhu sē wāā le ye, ye ma cɾeŋcɾeŋ. Ta laam wo, le ga waha pye cīinde. ¹⁹ Ye ma nii cɾeŋcɾeŋ, loo ge ga ta le n cā mpāy poo me pe n sron le Yesu kānde wāyār ne ye laam wo.

²⁰ Ye ma yii wãã, ma yee yaa Yĩnfua Yesu digi wãdin di, loo sê ne tee n pye ye. ²¹ Ye sê yãã, ye ma yee yaa di yaliile wo, wii ma pa digi gii ne, ufua ga ke kur di u ya ya. Mpãy ga kuee fãã ne, mpãy -sê ga di, pe maha defĩ wo u n sya pe yigi. ²² Kε wee la ye ye, ye n ga naa n di, ye naa n wo te wo? Ye yee la Yãhã kãndeyãrfa yawãhãfa wee ngaa ye? Ye n kε la ye naa fyar yaha mpãy na ngaa wee pe ye ye? Ye yee n maha lii pãã ye ye? Ndoo woo na, n saha ye sey kueekuee loo nde wĩ na ye.

²³ Kaklaha gii tẽ yãã Yĩnfua Yesu ye u dir wãdin wĩ na, n le cãã yar wa ye na, loo ne nde: Yĩmper gii laam wo, pe ba Yĩnfua Yesu yi u napĩ- kē, koo yĩmper wo, u ba cãã bur gbe, ²⁴ ma syaha wãã Yãhã kē, ma ke bur la cεr, ma u kãnyãrwai pye ma yee: «-Ye sya di, ke ma ta kadye draha wo, ta kadye gii ke wãã ye wĩ na. -Ye naa ke syi pye ye naa ye laam too ra wĩ na!» ²⁵ Pe di wa, u n defĩ sekui gbe, ma u kãnyãrwai pye ma yee: «Defĩ nwo ma ta ntõr draha wo, ta ntõr rii kãmay na Yãhã naambiyãrfãn le nawee- ne. -Ye naa defĩ wo koo syi ya dyaŋ yalebyε, ye naa ye laam too ra wĩ na!» ²⁶ Ye sê yãã, yalebyε ye ma nii bur di, ma nii defĩ wo koo syi ya dyaŋ, Yĩnfua Yesu wãku wĩ ne tee n yar, u wãdurba per n sya ba nɔ.

²⁷ Loo ne, ye yawãhã wo, wii ma Yĩnfua Yesu digi wãdin syi di, ma u defĩ wãwɔŋ syi wo, u laam yai pe sron. Mii loo sê ne ye, u kapee pye Yĩnfua Yesu kadye na, tesê u ntõr ne. ²⁸ Nawee yai u u ya yãŋ wa, tuu cã Yĩnfua Yesu digi wãdin syi di, u defĩ wãwɔŋ syi ne. ²⁹ Ye sê yãã, wii ma

Yĩnfua Yesu digi wādin syi di, u defĩ wāwɔŋ syi ne, u yai u cā digitrihi ya sē kē u n di ye. U yai u cā ke ma Yĩnfua Yesu kadye gɛ draha wo. Mii loo sē ne ye, Yāhā ga u pēn. ³⁰ Ye sē naa loo yāŋ ngaa ye; loo ne, ye laam wo nawee- busāā ma pe kadye teelaa klaha- pe ye, mpāy ma pe n yaa, mpāy ne pe ku. ³¹ Wo ma -sē yāŋ n le wo kapee-wāpyeŋ wo, wo saa pēn nantāŋ ye. ³² Yāhā ma -sē wo pēn, ke laantor le wo laam wo. Loo nde na, wo wĩ saa ba pye klaha- driyēfa ne ye.

³³ Wo nna, loo ne ye ma yii wāā ma yee yaa Yĩnfua Yesu dir di, -ye naa yii sēŋ! ³⁴ Ye ma cā fāā ye yigi, -ye cāā di ye klɛ wo! Loo na, ye saa ba tee naa n pye laa ne ke yawāhā wo, ye wāpēn yāā le na ye. Kai- nkāy ke kuee, n ma ba ka ye fla na, n ga ke war yi.

12

Yāhā Yrā le fānga tii wāā nawee- kē

¹ Wo nna, Yāhā Yrā le fānga tii wāā nawee- kē Yāhā tēn wĩ na, n n traha ye ke bye cā.

² Ye cā ma yee, tee sē ba cĩnde Yāhā cā wa ye, fānga gaa ter ba ye tyĩn naa n gaha yalebye mpar wān kue ye, too tii te sē n pāā ye. ³ N n traha ye le cā laha ye yee, Yāhā Yrā Fānga ma pye wii laam wo, u saha yoosēn pāā Yĩnfua Yesu kē ye. Tesē, wii ma yee Yesu ma Yĩnfua, Yāhā Yrā Fānga ma u laam wo, koo kē u n waha le pāā.

⁴ Yāhā tēn fānga ter ma te ya wuhu na. Yāhā Yrā nen ya -sē ne, le te wāā nawee- kē. ⁵ Yĩnfua Yesu nawee- taha tēŋ nkāy na, ke tēŋ wee wācɛŋ ye. Ke tēŋ bye -sē n tē woo ya kē. ⁶ Kai- busāā

n pye, koo Yāhā nenj ya -sē kē ke n ta nawee- n waha koo kai- pye. ⁷ Nawee nawee woo, Yāhā Yrā fānga gaa wāā u kē, fānga gii ke ga waha laa yō Yesu kāndeyārfa kē. ⁸ Ye sē yāā, Yāhā Yrā ga fānga wāā waa kē u n waha naa laantor kaplāŋ pāā. Le ga maha waa ter ta u n Yāhā wūhū cā yigi, u naa ke pāā nawee- ye. ⁹ Loo Yāhā Yrā nen ya kē, le ga maha fānga wāā waa ter kē u n Yīnfua Yesu sronj ta u Yater kānkai- bye wo. Le ga maha waa ter ta u n waha naa yanfa jaa. ¹⁰ Le ga maha waa ter ta u n waha naa laanwo wūhū pye. Le ga maha waa ter ta u n waha naa Yāhā kaplāŋ luhu u laam wo, u naa ke tōr nawee- ye. Le ga maha waa ter ta u n Yāhā Yrā kai- cā war naa n yi, kai- nkāy ne ke wee Yāhā Yrā wūhū ye. Le ga nwo ta u n waha naa yor raa ter syi pāā. Le -sē waa ta u n waha too yor ter nde kaplāŋ cā naa n tōr nawee- ye. ¹¹ Loo Yāhā Yrā nen ya ne, le koo kai- ngūi kur bye pye. Nawee nawee woo, Yāhā Yrā ga fānga wāā ufua kē le laam wāwāā, fānga gii syi ke saa pye wācɛŋ u nampyeŋ wāŋ ne ye.

Yesu Crise ma mii syi u kāndeyārfa ne?

¹² Ye cā kadye nen ma teebehe busāā ne. Ke teebehe wee wācɛŋ ye, ke kur bye -sē kē ke wāā le, ma nii kadye nen. Yesu kāndeyārfa yawāhāfa kur bye wīi ma koo syi dyaŋ. Yāhā Yīndefua Crise kāmāy na, pe bye wāā le, ma nii mii kadye nen ya dyaŋ. ¹³ Wo kur bye, mpāy pe ma Yiiffee-, mpāy ne pe wee Yiiffee- ye, mpāy ne pe ma yāmpa, mpāy ne pe wee yāmpa ye, wo bye tāā yi loho wo, ma wāā le, ma nii kadye nen dyaŋ loo

Yāhā Yrā nen ya kāmāy na. Le maha wo laam yī.

¹⁴ Kadye ma teebēhe busāā ne, tee nen ya sē ne ye. ¹⁵ Troho ga waha yee, koo wee koho draha syi wo ye, a loo nde na koo wee kadye teelaa ye. Ke ma sya loo pāā, loo kapān nde ga waha ta la ke saa nii kadye teelaa ye? ¹⁶ Nditye ga waha yee, koo wee yīnde draha syi wo ye, a loo nde na koo wee kadye teelaa ye. Nditye ma sya loo pāā, loo kapān nde ga waha ta la le saa nii kadye teelaa ye? ¹⁷ Kadye teebēhe bye ma ne pye tāṅ yīmpē fla, kadye ne ga pye mii ke naa n luhu? Ke ma -sē ne pye tāṅ ndityuhu fla, kadye ne ga pye mii ke naa dugu luhu? ¹⁸ Ye sē yāā, Yāhā kē ke kadye teebēhe bye ta te dre wo, ke laam wātaṅ. ¹⁹ Kadye ma ne pye teele nen laa ya ne, ke saa ne pye kadye ye. ²⁰ Lii ya le ma cīnde, teebēhe busāā kē ke ma kadye nen ya na.

²¹ Yīnde saha koho pye le yee, koho wīi wee loo na ye. Tesē, yīṅ saha tre pye ke yee, tre wīi wee koo na ye. ²² Aye, loo saha pāā ye. Kadye teebēhe nkāy gē fānga wee ke na ye, ke ma yee ke wee ye, kadye saha poho ye. ²³ Tesē, kadye teebēhe nkāy gē waa sē ke yāṅ ngaa ye, wo sē n faha ke wīi ne ye. Loo ne, kadye teebēhe nkāy waa sē ke yāṅ ye, wo ke gbihi n yigi. ²⁴ Teebēhe nkāy wo ke yāṅ, ke wāgbihiyigi wīi wee wo na ye. Kadye teebēhe nkāy waa sē naa ke yāṅ ngaa ye, Yāhā ta wo koo bya yāṅ kadye teebēhe bye ne wāceṅ. ²⁵ Loo nde na, kadye teebēhe saa naa n wāā ke ya ne, ke cer ke ya na ye. Ke ga wāā le, ke ke ya gbihi naa n yigi. ²⁶ Tesē, teele nen ma

n yaa, le ga nii mii kadye teebɛɛɛ byɛ dyaŋ ke n yaa. Tesɛ, kadye teele nen ma miyũhũ yãã, le ga nii nuhu wĩĩ kadye teebɛɛɛ byɛ ye.

²⁷ Ye byɛ ye ma u Crise kadye, ye nanem byɛ ma u kadye teele laa. ²⁸ Loo ne, Yesu kãndeyãrfa yawãr teebɛɛɛ byɛ wo, Yãhã cãã Yesu tẽnleɛɛ poo ta. Syãŋ wuhu, ke mpãy ta pe waha naa ke kaplãŋ luhu pe laam wo, pe naa ke tõr nawee-ye. Tãã wuhu, ke mpãy ta pe naa le Yesu kapãyĩĩ klaha nawee-ye. Loo kur ye, ke fãnga wãã mpãy kẽ pe n waha laanwɔ wũhũ pye, ma mpãy ta pe n waha yanfa jaa, mpãy ne pe koho le nawee-ye, mpãy ne pe ga waha nii yĩŋfa, mpãy ne pe ga waha naa yor raa ter syi pãã. ²⁹ Pe byɛ wee Yesu tẽnleɛɛ ye, Yãhã sɛ pe byɛ ta pe n waha ke kaplãŋ luhu pe laam wo, ma ke tõr nawee-ye ye. Pe byɛ wee le Yesu kapãyĩĩ klahafa ye. Pe byɛ wee laanwɔ wũhũ pyefa ye. ³⁰ Pe byɛ wee yanfa wãjaa fãnga ne ye. Pe byɛ sɛ me pe ga waha naa yor raa ter syi pãã ye. Pe byɛ sɛ me pe ga waha naa too yor ter nde kaplãŋ cã naa n tõr nawee-ye ye.

³¹ Yãhã tẽn fãnga tii te sron yõ, -ye naa too ke! N ga kãnde laa yar ye na, lii le yõ tãŋ too Yãhã tẽn fãnga nde byɛ na.

13

Lii le ma yĩŋ, ma ter kai- byɛ yaha

¹ N ma sya waha driyẽ yor ter byɛ pãã, tesɛ yãhãyĩŋ tẽnleɛɛ yor bya ne, n ma -sɛ yee nawee-ntãŋ sɛ dye ra tãy ye, ta yẽ kaplãŋ ga nii yĩŋ saa pye ke na ye. Ke ga nii mii gblen ya dyaŋ yĩŋ

wee ke na ye, gbengben gbleŋ dyaŋ. ² Laa na, n ga waha fānga yāā, n naa Yāhā kaplāŋ luhu ta laam wo, n naa ke tōr nawee-ye. Tesē, n ga maha waha Yāhā wūhū war, n ke kai-byε cā. Tesē, n ga maha waha Yesu ta ra Yater, n sya waha naa yāy ta te n yūhū naa n kãã. N ma sya waha koo kai-ngĩ byε pye, n ma -sē yee nawee- ntāŋ sē dye ra tãy ye, n wee ngaa ye. ³ N ga waha ta koho wān byε la klaha nawee- kē, n ga waha le sya n nii wāā pe n ta kadye sraha suhu naa laam wo le kapāyĩ wĩ na; n ma -sē yee nawee- ntāŋ sē dye ra tãy ye, koo byε saa laa yō waa kē ye.

⁴ Wii, nawee- ntāŋ n dye u tãy, ufua ma laanyĩn ne, u laam n tãy, u yĩnde sē yi n too waa kla na ye, u sē u ya sey ye, yataŋ wee u na ye. ⁵ U sē fyaryigi wūhū pye ye, u sē u ya ya diŋ ya ke ye, u sē ncafūhū di ye. Nawee ma laa tee pye u na, u ga tyii le n kua kãã u laam wo gbεgbε. ⁶ Kai-nkāy ke sē sroŋ ye, ke sē n tãy u ye ye. Kai-nkāy ke sroŋ, koo ke n tãy u ye. ⁷ Wii, nawee- ntāŋ n dye u tãy, u n tyii nawee- kapee- foho na u kuāŋ ne. Kānkai- byε wo, u Yesu ta u Yater, u koho taha n yaha Yāhā na, u laanyĩn yāā.

⁸ Wākuayāā wee ntāŋ wādye wĩ loo na ye. Yāhā kaplāŋ nkāy nawee ga waha ke luhu u laam wo, loo nde ga ba kua per gaa. Yāhā kaplāŋ wāpāā yor raa ter syi wo, loo nde ga ba kua per gaa. Kacān wūhū ga ba kua per gaa. ⁹ Ye sē yāā, wo saha kacān wūhū byε cā tāŋ ye. Yāhā kaplāŋ nkāy le wo laam wo, ke nanen ya too n war, ma ke tōr nawee-ye. ¹⁰ Kai lii le le ya kua, loo ma ba pa yaliile wo, kai- nkāy ke sē ke ya kua ye, koo

wũhũ -sẽ ga ba kua kãã.

¹¹ Tẽ pye kicar, n naa n pãã, ma naa laam ga, ma naa kai- yãŋ kicar wãŋ syi dyaŋ. Tẽ ba ɛ wa, n kicar wãŋ miy yaha. ¹² Nanga nge na, le ma mii wo ke Yãhã wũhũ yãã yirfayãŋ ya wo, cãã-biibiile ya na. Sukũhũ gaa laam wo, wo ga ba ke yãã gbɛgbɛ wo yaha ye. Nanga nge na, n sã ke kai- byɛ cã tãŋ ye. Sukũhũ gaa laam wo, n ga ba ke byɛ cã, mii Yãhã ra cã laha mii.

¹³ Loo na, katɛ- tãã kẽ ke ma, wãkuayãã wee ke na ye. Koo kẽ ngĩ: Yesu wãta Yater kãnkai-byɛ wo, tesẽ koho wãtahayaha ne Yãhã na, tesẽ ntãŋ wãdye wĩ ne. Koo kai- ngĩ wo, lii le cã ma yĩŋ, loo ne ntãŋ wãdyen ne.

14

-Ye naa Yãhã Yrã tẽn fãnga wũhũ koo kɛ!

¹ -Ye naa n kɛ nawee- ntãŋ poo n naa dye ye tãy! -Ye maha naa Yãhã Yrã tẽn fãnga wũhũ koo kɛ! Lii tee cã ga maha naa n kɛ, loo ne nde: Ye waha naa Yãhã kaplãŋ luhu ye laam wo, ye naa ke tãr nawee- ye. ² -Ye yãŋ, wii u waha yor raa ter syi pãã, tii nawee waa sã te cã ye, ufua sã ne ke pãã nawee- ye ye, u ne ke pãã Yãhã koo ya ye, koo kẽ. Yãhã Yrã Fãnga kẽ ke ne ufua ta u n waha kai- nkãy pãã, nkãy syi ke wũhũ nawee-na. ³ Wii u -sẽ Yãhã kaplãŋ luhu u laam wo, ma ke tãr nawee- ye, woo n pãã nawee- ne. U n kɛ pe naa n gaha yaha ye le Yesu kãnde wãyãr ne, pe maha pe ya plãhã pe kuee le laam wo, tesẽ pe maha naa laanyĩn yãã. ⁴ Wii u -sẽ Yãhã wũhũ pãã yor raa ter syi wo, woofua n kɛ u ka yaha ye

u ya ya le Yesu kãnde wãyār ne. Wii woo u -sẽ Yãhã kaplãŋ luhu u laam wo, ma ke tōr nawee-ye, u n ke Yesu kãndeyārfa yawãhãfa bye pe naa n gaha yaha ye le Yesu kãnde wãyār ne.

⁵ Ye bye ma waha n pãã yor raa ter syi wo, le yõ. Lii tẽ cã n ke loo ne nde: Ye waha naa Yãhã kaplãŋ luhu ye laam wo, ye naa ke tōr nawee-ye. Loo nde yõ ke wãpãã na yor raa ter syi wo, tii waa sê te cã ye. Waa ma fihĩ pye, u too yor ter war, ma ke kaplãŋ yĩntaha yar nawee- na, pe n naa n gaha yaha ye le Yesu kãnde wãyār ne, n sê sye loo na ye. ⁶ Wo nna, loo nde na, n ga ye yey nde ne: N ma ba ka ye fla na, ma ga nii n pãã ye ne yor raa ter syi wo, tii ye sê te cã ye, le ga laa yõ la ye kē? N ma -sẽ ba nii n pãã ye ne ye yor wo, ye ga naa ra kaplãŋ war. Loo na, n ga waha Yãhã wĩ laa syi yar ye na, laa na laantor wĩ laa, laa na Yãhã kapãn laa tẽ luhu ta laam wo, laa na kaklaha wĩ laa. Koo ga waha laa yõ ye kē. ⁷ Too fle wãwuu yãŋ, kornjoŋ wãpẽn ne, too rii te ma kapẽn wãn. Te wãpẽn mii ma yee te sê n yi te ya wuhu na gbege ye, waa saha ke yaa war ye. ⁸ Wii u tũtũũ syi wuu, ma nawee- yee naan wĩ na, ke wãwuu mii ma yee ke sê n war ye, yoo ga waha cã u naa u ya gbihi te naan wĩ na? ⁹ Koo syi, ye bya ye ma nii n pãã yor raa ter wo, tii waa sê te cã ye, ye kaplãŋ ga pye mii ke naa n war? Le ga nii mii wãgbleŋ ya dyaŋ tee n gble. ¹⁰ Yor ter nihi driyẽ wo, te bye -sẽ ma te yĩntaha ne te ya wuhu na. ¹¹ Nawee waa ter ma n pãã ra ne, n ma yee n sê u yor ter kaplãŋ war ye, u ga naa ra yãŋ kulaafua; ta bya -sẽ ga naa u yãŋ

kulaafua. ¹² Tee -sē Yāhā Yrā tēn fānga wūhū ke ye laam bye ne, fānga wūhū nkāy ke ga waha pe Yesu kāndeyārfa yawāhāfa ta pe n ka yaha ye, -ye naa koo ke!

¹³ Loo ne, wii u waha n pāā yor raa ter wo, u yai u Yāhā nar, ke n u ta u n maha waha naa ke kaplāṅ yīntaha yar nawee- na. ¹⁴ Ye sē yāā, ufua ma nii n pāā Yāhā ne yor raa ter wo, yor rii tuu sē te cā ye, u laam wo u cā u n pāā Yāhā ye, u sē -sē u ya yē kaplāṅ war ye. ¹⁵ U yai u lii pye? U ga naa n pāā Yāhā ye kaplāṅ nkāy ter syi ne, nkāy tuu sē waha ke war ye, -tuu maha naa n pāā Yāhā ye kaplāṅ nkāy ne, nkāy u koo war. U ga naa yay le Yāhā ye kaplāṅ nkāy ne u sē ke war ye, -tuu maha naa yay le kaplāṅ nkāy ne u koo war. ¹⁶ Ye sē yāā, ma'a nii Yāhā sey ma laam ya wo, pe yawāhāfa saha ke kaplāṅ war ye. Pe -sē ga ba pye mii, pe le cā pe ma yē wāā sya pe yee, «Amēn, le nii ke syi»? ¹⁷ Taa Yāhā sey kaplāṅ nkāy ne, ke ma sya yō, ma nampyeṅ saha ke war ke n laa yō u kē ye.

¹⁸ Ndoo waha n pāā yor raa ter syi wo, ma ta ter ye bye yaha. N syaha wāā Yāhā kē loo nde wī na. ¹⁹ N ma -sē pye Yesu kāndeyārfa yawāhāfa nsoho wo, n ma pe klaha kate- bua ya ne pe yor wo, koo puar n naa kaplāmbuar pāā pe ye yor raa ter wo, tii waa sē te cā ye.

²⁰ Wo nna, ye ma syi ye naa kai- yāṅ mii kicar me ye ne ye. -Ye nii pēyār wāṅ syi dyaṅ kapee- wāpyeṅ kuε ye, -tee -sē naa kai- yāṅ wāε yīntaha ne! ²¹ Ye sē yāā, le ma le yrūhū yaha Yāhā sabangbāṅ wo ma yee, Yāhā yee:

«N ga ba ta,
 yor raa terfa n ta kaplāŋ pãã Yisrēfa ye.
 N ga ba kulaafa yēr ta,
 n naa n pãã pe Yisrēfa ne.

Loo naa bye ne,
 pe saa ba naa ta kaplāŋ luhu ye.»

²² Loo ne, wāpãã yor raa ter syi wo, le ma kayar mpāy ye pe sē cīinde Yāhā cā ye, n sē yee Yesu kāndeyārfa poo ye. Waa Yāhā kaplāŋ wāluhu u ya laam wo, tesē ke wātōr ne nawee- ye, loo nde ma kayar pe Yesu kāndeyārfa poo ye, n sē yee mpāy pe sē cīinde Yāhā cā ye.

²³ Le ga waha pye ye Yesu kāndeyārfa yawāhāfa bye pe ya wāã. Ye bye ma nii n pãã yor raa ter wo, tii waa sē te cā ye, naweete- mpāy pe pa pe sē cīinde Yāhā cā ye, tesē mpāy ne pe pa kaplāŋ luhusaha wo, pe ga yee nafāān ne ye ne.

²⁴ Le ma -sē pye Yāhā kaplāŋ nkāy dye ye laam wo, ye n nii ke tōr yii wuhu na nawee- ye, koo puar. Loo na, mpāy pe pa pe sē cīinde Yāhā cā ye, tesē mpāy ne pe pa kaplāŋ luhusaha wo, pe ma ye yē kaplāŋ war, loo ga ta pe n le cā laha pe yee pe kapee- wāpyeŋ sē yō ye. Ye kaplāŋ ga nii pe ye kasāhā dyaŋ. ²⁵ Pe ga pe ya laam wūhū bye yāã gbaa na. Pe ga kānklūy gbāã kāntraha na, pe Yāhā sey, pe ye pye, a Yāhā ma ye ne cīinde.

Ye yai ye naa n pye mii yawāhā wo

²⁶ Wo nna, tee yai ye naa n pye mii, le nde: Ye ma yii wāã yawāhā wo, laa na, ye laam wo waa ma Yāhā wāsey yaa gaa ne; waa -sē ma kaklaha wīi laa ne; waa -sē ma Yāhā kapān laa dye u laam wo, wātōr wīi; waa -sē ma u ga Yāhā wīi laa pãã

nawee- ye yor raa ter wo; waa ter -sē ma wii tuu ga waha too yor ter nde kaplāŋ wā klaha, nawee-byɛ n ke war. Pe Yesu kāndeyārfa yawāhāfa ma koo kai- ngī byɛ luhu, ke yai ke waha pe ta pe n ka yaha ye le Yesu kānde wo. ²⁷ Ye ma yee ye ga Yāhā wūhū nkāy pāā pe yawāhāfa ye yor raa ter syi wo, ke pāāfa ma n ter nawee- tāā yaha ye. Pe maha naa ke pāā pe ya wuhu na. Nawee waa ter yai u maha pye, wii tuu ga waha ke kaplāŋ wā klaha, pe yawāhāfa byɛ n ke war. ²⁸ Le ma -sē pye koo kaplāŋ ngī wāklahafua wee ye, waa ma n yīmbui yir pe yawāhāfa n naa n luhu u ye ye. Wii ma nii kaplāŋ pāā yor raa ter syi wo, u naa ke pāā u ya ya Yāhā ye. ²⁹ Mpāy poo na pe Yāhā kapān laa luhu pe laam wo, poo syām syi, laa na tāā ya, ga waha kapān gbe, pe ke tōr nawee- ye. Pe yawāhāfa -sē ga yāŋ le pe kaplāŋ wo. ³⁰ Waa ma pye kapān na, loo yale wo Yāhā kapān laa ma dye waa ter laam wo, u n yee u ga le tōr, wii u ma kapān na, u yai u yaha le. ³¹ Loo nde na, Yāhā wūhū ma dye ye laam wo, ye ga waha naa ke tōr yii ye koo syi, yii wuhu na. Loo ga ta ye yawāhāfa ga kaklaha yāā, pe maha plāhā nii le Yesu kānde wo. ³² Mpāy pe koo Yāhā kaplāŋ luhu, ma ke tōr nawee- ye, pe yai pe pe ya wāyigi cā ke wāpāā yale ne. ³³ Ye sē yāā, Yāhā sē n traha nawee- pe nii wāplanpyefa ye. Ke n ke pe naa n nii yrīn na.

Mii le ma mii syi dyaŋ Yesu kāndeyārfa yawār wo, teebehe byɛ wo, ³⁴ ye ca yai pe yaha naa n le ye yawār wo, pe sē yai kaplāŋ wāpāā ne koo fla na ye. Ye sē yāā, Yāhā sabangbāŋ wo, le ma le yrūhū yaha ma yee, ca yai pe yīy kor naa n

le. ³⁵ Pe ma yee pe ga laa yey, pe ga naa le yey pe pa ye kle wo. Le sē yō cōo u naa n pãã Yesu kãndeyārfa yawãhã wo ye. ³⁶ Tee n pye ke syi, yii fla la le Yãhã kapãn yir laa, yii ya la tee le yãã?

³⁷ Wii ma yee Yãhã kaplãŋ n dye woo laam wo, u n ke tōr nawee- ye, laa na u ma le ga, a Yãhã Yrã Fãnga ma u ne, ufua yai u cã Yĩnfua Yesu kãnde wũhũ kē tē yrũhũ n yar ye na. ³⁸ Wii ma loo sye, Yãhã bya ga ba ufua sye.

³⁹ Wo nna, lii le ma le na, -ye naa n ke Yãhã kaplãŋ n naa n dye ye laam wo, ye n naa ke tōr nawee- ye! Ye ma syi ye sē Yãhã kaplãŋ wãpãã sye yor raa ter syi wo ye! ⁴⁰ -Ye naa ke kai- pye yĩntaha ne, ye ma n plan naa n pye ye!

15

Yesu Crise wãyir wĩ gbã wo

¹ Wo nna, le Yesu kapãyĩ lii tē pãã ye ye, ye le sya le yaha ye laam wo, ye yii plãhã le wo. N n traha n maha le gbihi pãã ye ye. ² Tē ba le yar ye na mii, ye ma le le yaha ye laam wo koo syi, le ga ta ye n sya yaha. Mii loo sē ne ye, le ga nii mii ye le ka sya ke dyaŋ.

³ Kai lii le ma yĩŋ, pe ra klaha le ne mii syi dyaŋ, ta bya, n ba ye klaha le ne koo syi dyaŋ. Loo ne nde: U Yãhã Yĩndefua Crise ku wo kapee-wĩ na, mii le bii cãã yrũhũ yaha Yãhã sabangbãŋ wo mii. ⁴ Pe u le gbĩ wo. Ke plii tãã wuhu, u n yir gbã wo, ma dur ba yrãŋ na gbaafa ye, mii le bii cãã yrũhũ yaha Yãhã sabangbãŋ wo mii. ⁵ U n u ya yar Pyar na. Loo kur ye, u n u ya yar pe

kānyārwai sēnsye syām na. ⁶ Loo kur ye, u n u ya yar u kānyārwai yĩisyām gbeebua mpāy na. Pe fānga ma nantāŋ yrāŋ na, nanem mpāy ya me pe ku pe laam wo. ⁷ Loo kur ye, u n u ya yar Syake na, ma ba u ya yar pe Yesu tēnlɛɛ byɛ na.

⁸ Poo mii byɛ kur ye, u n u ya yar ta bya na, ndoo wii n ma mii pe byɛ nambuange dyaŋ. ⁹ Ye sē yāā, ndoo kē n ma pe Yesu tēnlɛɛ byɛ nakūntāŋ. N sē yai gɛ yai pe naa ra yee Yesu tēnlɛɛ ye, n tee naa Yesu kāndeyārfa kɛ wāboo ne. ¹⁰ Yāhā laantār kāmāy na, tē ma ngii n nii koo. Ke kayĩ lii pye ra kē, le laa yō ra kē, ma sya ra ta gɛ ta ra n tēn tē ma ta tɛr pe Yesu tēnlɛɛ byɛ yaha. Cīinde -sē na, ndoo sē kē n waha yia loo tēn nde na ye, te Yāhā laantār roo fānga kē, laantār rii ke te wāā ra kē. ¹¹ Loo nde na, le tāy le pye ndoo woo, le tāy le pye poo woo, loo wĩ nen ya ne wo byɛ too n pāā ye ye Yesu Crise wĩ na, ye n u ta ye Yater.

Wo wāyir wĩ gbā wo

¹² Loo ne too n pāā nawee- ye ma yee, u Yāhā Yīndefua Crise yir gbā wo, ma dur ba yrāŋ na gbaafa ye. Yii mpāy -sē maha pye mii ma le pāā, a mpāy pe ku wa, pe saa ba yir gbā wo, pe nii yrāŋ na ye? ¹³ Le ma pye cīinde, le yīntaha ne u Crise sē yir gbā wo, ma dur ba yrāŋ na ye. ¹⁴ Le ma -sē pye u Crise sē yir gbā wo, ma dur ba yrāŋ na gbaafa ye ye, too u wĩ pāā ye ye, wo ka n pye; tee u ta ye Yater, ye ka pye. ¹⁵ Tesē, le ga nii mii wo kawar fua taha Yāhā na, ma yee ke u Crise ta u n yir gbā wo, ma dur ba yrāŋ na. Āwā, le ma pye cīinde, Yāhā sē nakur ta te n yir gbā wo, ma

n nii yrāŋ na ye, le yīntaha ne, ke sē u Crise ta u n yir gbā wo, ma dur ba yrāŋ na gbaafa ye ye. ¹⁶ Ye sē yāā, le ma pye nakur saa ba yir gbā wo, te nii yrāŋ na ye, le yīntaha ne, Yesu Crise sē yir gbā wo, ma dur ba yrāŋ na ye. ¹⁷ Le ma pye u Crise sē dur ba yrāŋ na ye, ye u ka ta ye Yater ke dyaŋ; kapee- nkāy tee pye, ke sē laha kāā ye na ye. ¹⁸ Tesē, Yesu kāndeyārfa mpāy bye pe ku, pe saa sya yaha ye. ¹⁹ Wo ma koho taha yaha u Crise na, ma yee u koho le wo ye driyē nge ya wo, wo wīl ga pee le ta ter nawee- bye wīl na.

²⁰ Lii le ma cīinde, loo ne nde: U Yāhā Yīndefua Crise woo kē u cāā yir gbā wo, ma dur ba yrāŋ na. Woo wīl le yar, mpāy pe ku pe bya ga ba yir gbā wo, pe nii yrāŋ na. ²¹ Ye sē yāā, nawee waa wīl bii ta, gbā n dye nawee- bye nsoho wo. Nawee waa ter wīl kē le ta yagaa, nawee- bye ga ba yir gbā wo, pe dur nii yrāŋ na. ²² Dama wīl le ta nawee- bye n nii n ku mii, mpāy bye pe -sē wāā le u Crise ne, poo bye ga ba yir gbā wo, pe nii yrāŋ na koo syi. ²³ Le ga ba nii mma ma syi dyaŋ: Yesu Crise woo u cāā yir wa pe bye yaha. Kur ye, mpāy pe ma u wām, poo ga ba yir pe ya ndoŋ gbā wo, pe nii yrāŋ na u durbaper. ²⁴ Loo kur ye, driyē kuayale ne. U Crise ga ba yīnfar ter bye kua kāā, tesē yahasee fle ne, tesē fānga ter bye ne. Loo kur ye, u ga kai- bye le soho u Tuhufua Yāhā koho wo. ²⁵ Ye sē yāā, u Crise yai u nii kai- bye yīŋ na, Yāhā n sya ba u napīl- bye yia, ke pe ta u n troho fyāhā tā pe na. ²⁶ Napīl wii u ga pye klaha- kur ye, woo kē gbā ne. ²⁷ Ye sē yāā, le ma le yrūhū yaha Yāhā sabangbāŋ wo

ma yee: «Yāhā ta u n troho fyāhā tā wān kur bye na.» Pe ma yee wān kur bye, pe sē -sē yee Yāhā bya ne ye. Koo kē ke wān kur bye yia, ma ta u Crise n troho fyāhā tā te na. ²⁸ Kai- bye fānga ma ba le soho u Crise koho wo, woo wii u ma Yāhā Dya, u ga u ya le soho Yāhā koho wo. Loo nde na, Yāhā ga nii ke kai- kur bye yīn na.

²⁹ Tee n yee, mpāy pe ku wa pe saa ba yir gbā wo, pe nii yrān na ye, nwa ta ye laam wo, mpāy pe ya tāā n yi loho wo mpāy kē pe ku wa?

³⁰ Ndoo tesē ra tēntēwai ne, nwa ta kayīhī n wo yāā yalebye le Yesu kapāyī wāpāā wī na? ³¹ Wo nna, plii bye gbā ma ra tāy tūntūn. Ye wī ma ra ye yīnkuāyir wī, wo Yīnfua Yesu Crise kāmāy na. Loo ne, n kai- ngī pāā ye ye. ³² Tē le sya, ma nii srā waygapyār ne Yefesyi wo, le ma ne pye naweete laam wī ya ne, le ga ba lii yō ra kē? Le ma pye mpāy pe ku wa, pe saa ba yir gbā wo, pe nii yrān na ye, ah -too naa wo troho tāhā plāhā nge yor wo ke n yee:

«-Too naa n di, wo naa n wo;

ye sē yāā, sukūhū gaa laam wo waa ku.»

³³ -Ye yii yigi, ye sē plāhā nge yāā ke n yee: «Mboo wii ma pye naweeyō, ma -sē nii n taha nawepee- na, pe ga ma le pe yor wo.» ³⁴ -Ye laantor yāā, loo le yō, tee tyii kapee- wāpyeŋ na! Ye laam wo, mpāy ma pe sē Yāhā wūhū cā ye. Le yai le naa fyar yigi ye kē!

Nakur kadye wāyir wī gbā wo

³⁵ Waa ga waha le yey u yee, a mpāy pe ku wa, pe ga ba pye mii pe yir gbā wo, pe nii yrān na? Pe kadye ga ba nii mii syi dyan? ³⁶ Naplege kē

ufua ne. Ye sē yāã, ma'a ngaa pua le kântraha wo, le pua yai le ku wa le câ fîy. ³⁷ Ngaa pua ya ne taa le kântraha wo. Le ga waha pye sepua syi, laa na ngaa ter pua. Ke digi wāŋ gii ke fîy wa ma nii wan, koo sē kē taa le kântraha wo ye. ³⁸ Pua woo pua woo, Yāhã ga u ta u n fîy koo laam wāfîy. Pua woo pua woo, u yai u fîy u nii ngii, Yāhã ga u ta u n fîy u nii koo kla. ³⁹ Yāhã ke wān tii bye tãhã, tesē nawee ne, te bye kadye wee wācɛŋ ye: Nawee kadye ma ke ya ya; treresyar kla kadye ma ke ya ya; kãnsyã kadye ma ke ya ya; fua kadye ma ke ya ya. ⁴⁰ Yāhã yīŋ wān bya ma, tesē kântraha wān ne. Yāhã yīŋ wān nayōr ma te ya ya, kântraha wān nayōr ma te ya ya. ⁴¹ Yai nayōr ter ma ke ya ya, yron nayōr ter ma ke ya ya, yrompii nayōr ter ma ke ya ya. Pe yrompii bye gɛ, pe nayōr ma pe ya wuhu na.

⁴² Mpāy pe ku wa, pe ma ba yir gbã wo, ma nii yrãŋ na, le ga ba nii koo syi dyaŋ. Nakugu kadye ma le wa gbũ wo, ke ga fũhũ. Ke ma yir gbã wo, ma nii yrãŋ na, ke saa ku nantãŋ ye. ⁴³ Nakugu ma le kântraha wo, ke wee ngaa ye, fãnga wee ke na ye. Ufua ma ba yir gbã wo, ma nii yrãŋ na, u ga nayōr yāã, u maha nii fãnga ne. ⁴⁴ Nakugu ma le kântraha wo, ke ma kântraha kla ya dyaŋ. Ufua ma -sē ba yir gbã wo, ma nii yrãŋ na, u ga nii Yāhã Yrã kla. Yagaa, wo ma kântraha kadye ne, wo ga ba nii Yāhã Yrã kadye ne. ⁴⁵ Ye sē yāã, le ma le yrũhũ yaha Yāhã sabangbãŋ wo ma yee: «Dama wii u ma nawee cir, Yāhã kē ke bii ta u n nii yrãŋ.» Yesu Crise wii u ma mii Dama syãŋ wuhu waa dyaŋ, woo ma Yāhã Yrã lii le cĩnde

yrã wãã nawee kê. ⁴⁶ Yãhã Yrã kla koo sê kê ke cãã n pai ye. Kãntraha kla kê ke cãã n pai, Yãhã Yrã kla n cã taha. ⁴⁷ U Dama cir Yãhã bii u tãhã cuhu ne, u n nii kãntraha kla. U Dama syãñ wuhu woo ma yãhãyĩñ kla. ⁴⁸ Mpãy pe ma kãntraha wãm, pe ma mii wii dyañ Yãhã bii u tãhã cuhu ne. Mpãy pe ma yãhãyĩñ wãm, poo wĩ ma mii wii dyañ u ma yãhãyĩñ wũũ. ⁴⁹ Yagaa, wo ma mii wii dyañ u pye kãntraha kla. Wo ga ba nii mii wii dyañ u ma yãhãyĩñ kla.

⁵⁰ Wo nna, lii n n traha n pãã ye ye le nde: Wii u ma kãntraha kla, kadye ne u ye ntãñ ne, u saha dye Yãhã yai klo wo ye. Kãntraha kadye ma gbã koho wo, kadye nge syi saha kuee yai tãñ yrãñ ye.

Gbã saa ba pye yãã nantãñ ye

⁵¹ Yagaa, n ga kai laa pãã ye ye, lii tee sê cã ye. Wo bye saa ba ku tãñ ye. Mpãy pe ku wa, tesê mpãy ne pe ga ba pye yrãñ na, pe bye kadye ga ba wã klaha. ⁵² Le ga ba pye le yalebye wo, teele nen ya, yaliile wo tũũtũũ ma ba yer wãwuu ne. Tũũtũũ ma ba wuu, mpãy pe ku ter wa, pe ga yir gbã wo, pe kuee yai tãñ yrãñ na. Wii mpãy wo ma yrãñ na, wo bye kadye ga ba wã klaha. ⁵³ Ye sê yãã, kadye nge gii ke ga waha fũhũ, ke yai ke ba nii ke saha fũhũ yãã ye; koo gii wãkuyãã ma ke na, ke yai ke ba nii wãkuyãã wee ke na ye. ⁵⁴ Kadye nge gii ke ga waha fũhũ, wãkuyãã ma ke na. Sukũhũ gaa laam wo, ke ga ba nii ke saha fũhũ yãã ye, wãkuyãã saa pye ke na ye. Loo yale wo, Yãhã sabangbãñ kaplãñ ngĩ ga nii cĩĩnde. Koo kaplãñ kê ngĩ:

«Gbã wĩ kua, gbã yia tãŋ!

⁵⁵ Gbã saha yia wãboo na nantãŋ ye.

Gbã fãnga kua.»

⁵⁶ Gbã fãnga yi kapee- wãpyeŋ wo. Kapee- wãpyeŋ fãnga -sẽ yi Yãhã kãnde katan wo.

⁵⁷ Yãhã kē ke fãnga wãã wo kē Yesu Crise kãmay na, wo n waha n yia. Ke miingbãŋ yai ke naa n sey yalebye!

⁵⁸ Loo nde na, wo nna, -ye yii plãhã, Yesu wĩ n nii gbãã ye laam wo, ye n u tẽn tẽn naa n yõ. Ye le cã ma yee, le Yĩŋfua Yesu tẽn lii tee n tẽn woo gɛ kãmay na, tẽwai sã ne ye.

16

-Ye naa koho le ye Yesu kãndeyãrwai ye!

¹ Pe war wãwãã wĩ na mpãy kē pe ma Yãhã nawee-, tẽ ba Galasyi Yesu kãndeyãrfa yawãhãfa yar pe naa n pye mii, ye bya -ye naa n pye koo syi! ² Jimaasyi jimaasyi, nawee nawee woo, tuu ga waha yia kii na, u koo cɛr yi ta yaha u ya tãy teelaa wo. Loo na, n ma ba pa ye fla na, ye saa naa yii fãy war wãwãã wĩ ne ye. ³ N ma ba ka ye fla na, ye ga naweeyõm mpãy yãŋ yi, ye pe war bye le soho poo koho wo. Ndoo -sẽ ga sabar yrũhũ, n le soho pe koho wo. Ke syi, pe ma ga dye Yurusalem wo, ke fla Yesu kãndeyãrfa ga pe wãpa yĩŋ cã. ⁴ Ta bya ma -sẽ yai n ka Yurusalem wo, waa ke yrãhã yi wii na pe ne.

Kai- nkãy Pɔl n traha u pye

⁵ N ma ba ka Maseduan kãntraha na, n ga ta tɛr ga ye fla na. N n traha n ga yi Maseduan Yesu kãndeyãrfa na. ⁶ Laa na n ga ba faa ma- ye fla

na, laa na n ga ba wer cãã bye pye ye fla na. Loo na, teelaa fla wãkaŋ ma ba yi ra na, ye ga waha koho le ra ye, ta n ka ke fla na. ⁷ Yagaa woo, n sē n traha wo n wii yãã wãyãã ya, ta n ta ter ye. N n traha n ba yalaa dye ye fla na, Yĩnfua Yesu ma le sya.

⁸ Pããnkoti gbar -sē ga ra yãã Yefesyi na nwo.

⁹ Ye sē yãã, ta yĩŋ tã y tēngbã y laa ne nwo, koo kē. Napĩ- wãnihi naa bye ne, n ga loo tēn nde tē.

¹⁰ Timuti ma pa ye fla na, -ye u yigi yõ! Ye sē yãã, woo bya ma le Yĩnfua Yesu tēn na ta wãŋ syi dyaŋ. ¹¹ Ye ma syi ye ga naa u kloŋ ye! -Ye koho le u ye u n waha u yrãhã yi yrĩŋ ne, u pa ra fla na. Wo u sēŋ, ndoo tesē pe Yesu kãndeyãrfa ne. ¹² Wo tēntēwε Apolosu woo wĩ na, n naa u nar u ka ye fla na, pe Yesu kãndeyãrfa mpã y ne. Le sē -sē pye u laam wo yagaa ye. U ma ba draha yãã, u ga ba ka.

Kaplãŋ kuasaha, syaha ne

¹³ Ye ma n faha yii na ye, -ye ta Yesu wĩ n nii gbãã fãnga ne ye laam wo! -Ye naa tetege le yii wo, -ye naa yii plãhã le Yesu kãnde wo! ¹⁴ Ye tyii ye ntãŋ n dye yii tã y ye kãnkai- bye wo!

¹⁵ Wo nna, ye Tefanase cã u kahafa ne. Ye cã poo me pe cãã dye le Yesu kãnde wo Yakayi kãntraha na. Le tã y pe ye, pe n nii koho le pe Yesu kãndeyãrwai ye. ¹⁶ -Ye naa nagboho ta poosyifa na, tesē mpã y bye ne pe ma le Yĩnfua Yesu tēn na! ¹⁷ Tefanase ye wãpa wĩ tã y ra ye, Fartinase ne, Yakakuse ne; tee sē pye ye, poo me pe pye ra ne ye draha wo. ¹⁸ Pe pa ma ba ra

laam yĩn, le n maha ye bya laam yĩn ye kē. Ye yai poosyifa wĩĩ n naa n tã̃y ye ye!

¹⁹ Yasyi kãntraha Yesu kãndeyãrfa yawãrfa bye ye syar. Yakila u cɔɔ Persyile ne, ma suhu Yesu kãndeyãrfa mpã̃y ne pe pe ya wãã pe kaha wo, pe ye syar Yesu kãndeyãrfa syaha ne. ²⁰ Wo teende Yesu kãndeyãrfa bye ye syar. -Ye yii syar naambiyãr syaha ne!

²¹ Ndoo Pɔl, n ga kaplã̃ŋ ngĩĩ kuasaha yrũhũ nii ya: N ye syar. ²² Wii ma yee Yĩ̃nfua Yesu wĩĩ sē n tã̃y u ye ye, yoosēn te pye ufua na. Maranata: Wo Yĩ̃nfua Yesu, pa!

²³ Wo Yĩ̃nfua Yesu, u u laantãr yar ye na. ²⁴ Ye bye ntã̃ŋ dye ra tã̃y. Wo bye wãã le Yesu Crise kãmay na.

YĀHĀ NAAMBIYĀRFĀN SABA
Karaboro, Eastern: YĀHĀ NAAMBIYĀRFĀN SABA
New Testament

copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

PDF generated using Haiola and XeLaTeX on 22 Feb 2024 from source
files dated 29 Jan 2022

15120496-00e2-503a-8d40-2d7cfdc1ba5b